

萬 有 文 庫

第 二 集 七 百 種

王 雲 五 主 編

昭 德 先 生 郡 齋 讀 書 志

(一)

晁 公 武 撰

商 務 印 書 館 發 行



昭德先生郡齋讀志

(一)

晁公武撰

國學基本叢書

昭德先生讀書志四卷蓋所得南陽井氏藏書也井氏始收之蜀道聚于廬山之陽既乃歸先生徙而置之三峨之下書今不可得盡見矣而志獨存宜春士趙希弁公族之秀博學好古藏書亦富遂以屬之校正因即其所藏之目參焉已載者不復取未
有者補其缺其間互出者蓋詳略

之不同文義之或異而後來諸賢之
所著述亦藉以槩見蓋為五卷別
以讀書附志併錄諸梓俾得託晁
氏而茲傳抑以壽趙君之所感博極
君子當有取於斯淳祐己酉日南至
宜春郡假守番陽黎安朝謹書

昭德先生郡齋讀書志

門人承議郎新奏辟通判茂州軍州事賜緋杜鵬舉序

先生姓晁氏名孟武校并氏書為讀書志凡四卷鵬舉作邑峨下望先生滄洲之居雞犬相聞暇即問奇字於古松流水之間一日叩以此書忻然相付先生博物洽聞雅稱海內孰知萬籍樓中先生所得蓋已超出文序而此筌蹄尚足為賓子之光因廣其傳席吾儕晚學於未見書畧知其

際尚先生刮蒙叢部之意云

昭德先生郡齋讀書志序

王宋所以能博者

魏王粲爲蔡中郎所竒盡得其家自文元公來以

物多識問無不對 國朝宋宣 正之功世無與讓

文莊家書故藏書之富與祕閣 戈之後尺素不存

聞于時夫世之書多矣顧非一人之力所能聚設令

篤好而能聚之亦老將至而耄且及豈暇讀哉然則

王宋所以能博者蓋自少時已得先達所藏故也余

家自文元公來以翰墨顯者七世故家多書至於是

正之功世無與讓然自中原無事時已有火厄及兵

戈之後尺素不存也余仕官連蹇久益窮空雖心志

未衰而無書可讀每恨之南陽井公天資好書自知興元府領四川轉運使常以俸之半傳錄時巴蜀獨不被兵人間多有異本聞之未嘗不力求必得而後已歷十餘年所有甚富既罷載以舟即廬山之下居焉與余厚一日貽余書曰度老且死有平生所藏書甚祕惜之顧子孫稚弱不自樹立若其心愛名則爲貴者所有若其心好利則爲富者所有恐不能保也今舉以付子他日其間有好學者而後歸焉不然則子自取之余惕然從其命凡得書若干部計若干卷今三榮僻左少事日夕躬以朱黃讎校舛誤每終篇

輒撮其大指論之豈敢効王宋之博所期者家聲是
繼而已其書則固自若也儻遇井氏之賢當如約

昭德先生郡齋讀書志序

昭德先生郡齋讀書志卷第一上

自漢武帝之後雖世有治亂無不知崇尚典籍劉歆始著七略總錄群書一曰輯略二曰六藝三曰諸子四曰詩賦五曰兵書六曰術數七曰方技至荀勗更著新簿分爲四部一曰甲部紀六藝及小學等書二曰乙部有古今諸子家及兵書術數三曰丙部有史記及故事四曰丁部有詩賦圖譜勗之簿蓋合兵書術數方技於諸子自春秋類摘出史記別爲一六藝諸子詩賦皆仍歆舊其後歷代所編書目如王儉阮孝緒之徒咸從歆例謝靈運任昉之徒咸從勗例唐

之分經史子集藏於四庫是亦祖述勗而加詳焉歐陽公謂其始於開元其誤甚矣今子所錄書史集徧衆若依七略則多寡不均故亦分爲四部焉

經部其類十一曰易類二曰書類三曰詩類四曰禮類五曰樂類六曰春秋類七曰孝經類八曰論語類九曰經解類十曰小學類孔氏之教別而爲六藝數十萬言其義理之富至於不可勝原然其要片言可斷曰脩身而已矣修身之道內之則本於正心誠意致知格物外之則推於齊家治國平天下內外兼盡無施而不宜學者若以此而觀六藝猶坐璇璣以窺

七政之運無不合者不然則悖謬乖離無足恠也漢承秦後六藝皆出於灰燼之餘學者韻問名家故易有田氏焦氏費氏詩有魯詩韓詩齊詩春秋有鄒邾左丘明公羊高穀梁赤禮樂有大小戴之殊書有古文今文之異各尊其師說而伐其異已者黨枯骸護麤簡至於忘父子君臣之分爭辯不少屈其弊甚矣迨至晉魏之後此弊雖衰而學者徒剽賊六藝之文飾其辭章以譁世取寵而不復有明道之意無以議爲及唐之中葉海內又安士稍知宗尚經術而去聖愈遠異端並興學書者則以今文易古文而頗改其

辭學春秋者則合三傳之同異而雜舉其義不本所
承決以曾臆以迄于今釋老申韓之說雜然滿於六
經之中雖與漢儒之學不同而其失一也凡此者豈
有他哉皆不能探修身之道反刻意於章句是以迨
迨千載之間悖謬乖離殊塗而同歸至此其極悲夫
今所錄漢唐以來之書其備觀者其慎擇焉論語孝
經自班固以來皆附經類夫論語群言之首孝經百
行之宗皆六經之要其附於經固不可易又藝文志
有小學類四庫書目有經解類蓋有補於經而無所
系屬故皆附于經今亦從之

易類

王弼周易十卷

右上下經魏尚書郎王弼輔嗣注繫辭說卦雜卦序卦弼之門人韓康伯註又載弼所作略例通十卷自商瞿受於孔子六傳至田何而大興為施讎孟喜梁丘賀其後焦贛費直始顯而傳受皆不明由是分為三家漢末田焦之學微而費氏獨存其學蓋章句惟以彖象文言等十篇解上下經凡以彖象文言等參入卦中皆祖費氏東京荀爽馬鄭皆傳其學王弼最後出或用鄭說則弼亦本費氏也歐陽永叔見此遂

謂孔子古經已亡按劉向以中古文易經校施孟梁丘經或脫去無咎悔亡唯費氏經與古文同然則古經何嘗亡哉

周易正義十四卷

右唐國子祭酒孔穎達與顏師古司馬才章王恭馬嘉運趙乾叶王談于志寧等同撰蘇德勳趙弘智覆審序稱江南義疏有十餘家辭尚虛誕皆所不取唯王弼之學獨冠古今以弼爲本采諸說附益之

易乾鑿度二卷

右舊題蒼頡修古籀文鄭氏注按唐四庫書目有鄭

玄注書詩緯及有宋均注易緯而無此書其中多有不可曉者獨九宮之法頗明昔通儒謂緯書偽起哀平光武既以讖立故篤信之陋儒阿世學者甚衆鄭玄何休以之通經曹褒以之定禮歷代革命之際莫不引讖爲符瑞故桓譚張衡之徒皆深疾之自符堅之後其學殆絕就使其尚存猶不足保況此又非真也

卜子夏易十卷

右舊題卜子夏傳唐藝文志已亡子夏書今此書約王弼注爲之者止雜卦景迂去唐張弧僞作

京房易三卷

右隋有漢京房章句十卷此書舊題京房傳吳陸績注皆星行氣候之學非章句也

關子明易一卷

右魏關子明傳子明名卽元魏太和末王虬言于孝文孝文召見之著成筮論數十篇唐趙蕤注蕤去恨書亡半隨文詮解才十一篇而已四庫書景載

李氏集解十卷

右唐李鼎祚集解經皆避唐諱又取序卦各冠逐卦之首所集有子夏孟喜京房馬融荀爽鄭康成劉表何晏宋衷虞翻陸績于寶王肅王輔嗣姚信王廙張

璠向秀王凱沖侯果蜀才程玄韓康伯劉瓛何安崔
憬沈麟士盧氏崔觀孔穎達三十餘家又引九家易
乾鑿度義所謂蜀才者人多不知按顏之推云范長
生也其序云自卜商之後傳註百家唯王鄭相沿頗
行於代鄭則多參天象王乃全釋人事易之道豈偏
滯于天人哉而天象難尋人事易習折楊黃華學徒
多從之今集諸家刊輔嗣之野文補康成之逸象以
貽同好蓋宗鄭學者也隋書經籍志所錄易類六十
九部子今所有五部而已閔卽易不載于目乾鑿度
自是緯書焦贛易林又屬卜筮子真書或云張弧僞

爲然則隋志所錄捨王弼書皆未得見也獨鼎祚所集諸家之說時可見其大指唐錄稱鼎祚書十七卷今所有十卷蓋亦失其七惜哉

周易口訣義七卷

右唐史證撰抄注疏以便講習田氏乃以爲魏鄭公撰誤也

周易微旨三卷

右唐陸希聲撰希聲大順中棄官居陽羨自號君陽道叟著傳十卷別撰易圖一指說一釋變一微旨一通十卷此微旨也皆設問答

周易舉正三卷

右唐鄭京撰京嘗任蘇州司戶序稱京家藏王弼韓康伯手扎周易本及石經校正一百三十五處二百七十三字蓋以繇彖相證有闕漏處可推而知託去得王韓手札與石經耳如渙之繇利涉大川下有利貞字而彖辭無之則增入漸之繇女歸吉下無也字而彖辭有之則削去他皆此類

元命包十卷

右唐衛元嵩撰蘇源明傳李江注坤爲首因八卦世變爲六十四卦之次又著運著說源二篇統言卦體

不列爻位自去周易元包一也

易軌一卷

右偽蜀蒲乾貫撰專言流演其序去可以知否泰之源察延促之數蓋數學也景迂去按劉道原十國紀年乾貫作虔觀今兩字皆誤

易論三十三卷

右皇朝王昭素撰昭素居酸棗 太祖時嘗召令講易其書以注疏異同互相詰難蔽以已意

證墜簡一卷

右皇朝天禧中毗陵從事建溪范諤昌撰其書酷類

郭京舉正如震卦彖辭內云脫不喪匕鬯四字程正
叔取之漸卦上六疑陸字誤胡翼之取之自謂其學
出於湓浦李處約廬山許堅意者豈果有師承故程
胡有所取焉

胡先生易傳二十卷

右皇朝胡瑗撰瑗字翼之泰州人通經術樂律教人
有法在湖州從其學者常數百人成材而備朝廷器
使者不可勝數此解甚詳或云門人倪天隱所纂非
其自著也無繫辭

周易述聞一卷隱訣一卷補解一卷精微三卷

右皇朝皇甫泌撰又有紀師說辯道通爲八卷

邵康節皇極經世十二卷

右皇朝邵雍撰雍字堯夫謚康節隱居博學尤精于易世謂其能窮作易之本原前知來物其始學之時睡不施枕者至三十年此書以元經會以會經運經世起於堯即位之二十二年甲辰終於周顯德六年己未編年紀興亡治亂之事以符其學又有觀物篇系于後其子伯溫解

劉長民易十五卷

右皇朝劉牧長民撰仁宗時言數者皆宗之慶曆

初吳祕獻其書于朝優詔獎之田況爲序

鈞隱圖三卷

右劉牧撰皆易之數也凡四十八圖并遺事九有歐陽永叔序而其文殊不類

鄭揚庭周易傳十二卷

右皇朝鄭史揚庭撰姚嗣宗謂劉牧之學受之吳祕祕受之史史又作明數明象明傳道明次例明範五篇邵雍言史竊其學於王豫沈括亦言史之學似雍云

王逢易傳十卷

右皇朝王逢撰嘗爲國子直講其學宗王弼

溫公易說一卷

右皇朝司馬光君實撰雜解易義無詮次未成書也

周易聖斷七卷

右皇朝鮮于侁子駿撰本之王弼劉牧而時辯其非且云衆言淆亂析諸聖故名其篇曰聖斷

周易古經二卷

右皇朝呂大防微仲編其序云彖象以爲注乃分於卦爻之下學者於是始不見完經而文辭次第貫穿之意亦缺然不屬因按古文而正之凡十二篇別無解釋

毗陵易傳十一卷

右皇朝蘇軾子瞻撰自言其學出於父洵且謂卦不可爻別而觀之其論卦必先求其所齊之端則六爻之義未有不貫者未嘗鑿而通也

程氏易十卷

右皇朝程頤正叔撰朱震言頤之學出於周敦頤得之於穆脩亦本於陳搏與邵雍之學本同然考頤之解不及象數頗類胡瑗爾景迂去胡武平周茂叔同師潤州鶴林寺僧壽涯其後武平傳其學于家茂叔則授二程與震之言不同

周易義海一百卷

右皇朝房審權撰集鄭玄至王安石凡百家摘取其
專明人事者為一編或諸家說有異同輒加評議附
之篇末

乾生歸一圖兩卷

右皇朝石汝礪撰先辯卦象之象之別後列數圖頗
雜以釋老之說

王介甫易義二十卷龔原注易二十卷耿南
仲注易二十卷

右皇朝王安石介甫撰介甫三經義皆頒學官獨易

解自謂少作未善不專以取士故紹聖後復有龔原
耿南仲注易三書偕行于場屋

晁以道古易十二篇

右從父詹事公撰以諸家易及許慎說文等九十五
書是正其文且依漢田何本分易經上下并十翼通
爲十二篇以矯費氏王弼之失謂劉向嘗以中古文
易經校施孟梁丘經至蜀李譔又嘗著古文易遂名
之曰古易公諱說之字以道昔班固自序其父祖事
皆著名表種字其叔父曰絲人皆不以爲非今錄先
世及諸父所著書若不記名字則後莫知爲誰非史

之比故不敢効孟堅况非百斤輒援表種舊例士餘皆傲此

晁以道太極傳六卷因說一卷太極外傳卷右從父詹事公撰其學本之邵雍自云初學京房後遇楊賢寶得其傳初著商瞿傳亡之建炎中再作此書時年七十一

晁以道易玄星紀譜一卷

右族父詹事公撰温公玄曆及邵康節太玄準易圖合而譜之以見揚雄以首準卦非出私意蓋有星候為之機括且辯正古今諸儒之失如羨不當準臨明

夷不當準大壯之類凡此難與諸家口舌爭觀譜則彼自屈矣此譜之所以作也

朱子發易集傳十一卷易圖三卷叢記一卷
右皇朝朱震子發撰自謂其學以程頤爲宗和會邵
雍張載之論合鄭玄王弼之學爲一云其書多采先
儒之說以成故曰集傳

先天易鈔太極寶局兩卷

右皇朝牛師德撰自云傳邵雍之學於司馬溫公而
其說近於術數未知其信然否

芸閣先生易解一卷

右皇朝呂大臨與叔撰有統論數篇無詮次未完也

焦氏易林十六卷

右漢天水焦贛延壽傳易於孟喜行事見儒林傳中此其所著書也費直題其前曰六十四卦變又有唐俞王序其書每卦變六十四總四千九十六首皆為韻語與左氏傳所載鳳凰于飛和鳴鏘鏘漢書所載大橫庚庚子為天王之語絕相類豈古之下者各有此等書耶

書類

尚書十三卷

右本古文孔安國傳五十九篇安國取序一篇分諸篇之首更定五十八篇晉之亂歐陽夏侯尚書並亡晉梅頤始得此傳闕舜典一篇乃以王肅注足成上之齊建武中吳姚方興得之於大稚比王注多二十八字唐孝明不喜古文以今文易之又頗改其辭如舊無頗今改无陂是也按安國既定古文會有巫蠱事不復以聞藏于私家而已是以鄭康成注禮記韋昭注國語杜預注左氏趙岐注孟子遇引今尚書所有之文皆曰逸書蓋未嘗見古文故也然嘗以禮記校說命孟子較泰誓太義雖不遠而文不盡同意者

安國以隸古定時失之耳

尚書正義二十卷

右孔穎達等撰因梁費彪疏廣之注唐儒學傳稱穎達與顏師古司馬才章王恭王琰撰五經義訓百餘篇號義贊詔改爲正義包括異家爲詳備然其中不能無謬冗馬嘉運駁正其失永徽中于志寧張行成高季輔就加增損始布天下藝文志云穎達與李子雲王德韶等撰朱長才蘇德融隋德素王士雄趙弘智審覆長孫無忌李勣等二十四人刊定唐史志傳記事多參差此爲尤甚所記撰著人姓氏穎達外往

往不同

古文尚書十三卷

右漢孔安國以隸古定五十九篇之書也蓋以隸寫籀故謂隸古其書自漢迄唐行於學官明皇不喜古文改從今文由是古文遂絕陸德明獨存其一二於釋文而已 皇朝呂大防得本於宋次道王仲至家以較陸氏釋文雖小有異同而大體相類觀其作字竒古非字畫傳會穿鑿者所能到學者考之可以知制字之本也

尚書大傳三卷

右秦伏生勝撰鄭康成注勝至漢孝文時年且百歲歐陽生張生從學焉音聲猶有訛誤先後猶有差舛重以篆隸之殊不能無失勝終之後數子各論所聞以已意彌縫其闕而別作章句又特撰大義因經屬指名之曰傳後劉向校書得而上之

尚書解十四卷

右皇朝顧臨蔣之奇姚闢孔武仲劉敞王會之周範蘇子才朱止夫吳孜所撰後人集之爲一編然非完書也

胡翼之洪範解一卷

右皇朝胡璣翼之撰皆其門人所錄無詮次首尾

張晦之洪範一卷

右皇朝張晦之撰晦之景祐三年爲房州參軍著論
七篇

洪範傳一卷

右皇朝王安石介甫撰安石以劉向董仲舒伏生明
災異爲蔽而別著此傳以庶徵所謂若者不當訓順
當訓 如人君之五事如天之兩暘寒燠風而已大
意言天人不相干雖有變異不足畏也

楊元素書九意一卷

右皇朝楊繪元素撰其序云註書春秋同出於史而仲尼或刪或修莫不有筆法正而詩春秋先儒皆言之書獨無其法邪故作斷堯虐辜夏書禪讓稽古商書周書費誓秦誓意九篇

蘇明允洪範論圖一卷

右皇朝蘇洵明允撰三論皆怪怪經繫傳序末以歸本二圖一以指歆向之繆一以形其意

新經尚書義十二卷

右皇朝王雱撰雱安石之子也熙寧六年命呂惠卿兼修國子監經義王雱兼同修撰王安石提舉而雱

董是經頒於學官用以取士士或少違異輒不中程
由是獨行于世者六十年而天下學者喜攻其短自
開黨錮之禁世人羞稱焉

書義辯疑一卷

右皇朝楊時中立撰其書專攻王雱之失時仕至禮
部侍郎

東坡書傳十三卷

右皇朝蘇軾子瞻撰熙寧以後專用王氏之說進退
多士此書駭異其說爲多又以胤征爲羿篡位時康
王之誥爲失禮引左氏爲證與諸儒之說不同

顏吳范司馬無逸說公即解三卷

右皇朝吳安詩范祖禹司馬康元祐中侍講筵顏復說書崇政殿日所進講說也

伊川書說一卷

右皇朝程頤正叔之門人記其師所談四十餘篇

洪範會傳一卷

右皇朝孫諤撰元祐中博士其說多本先儒頗攻王氏之失

書傳一卷

右不載撰人蓋爲程正叔之學者疑諸呂所著也

詩類

毛詩詁訓傳二十卷

右古詩三千餘篇孔子刪取其三百一十篇爲經後
亡其六漢興分爲三申公作詁訓詁號魯詩轅固生作
傳號齊詩韓嬰作傳號韓詩皆列學官最後毛公詩
出自謂子夏所傳公趙人爲河間獻王博士五傳至
東京馬賈二鄭皆授其學魏晉間魯齊詩遂廢而韓
詩僅存毛公詩獨行至今世謂其解經最密其序蕭
統以爲卜子夏所作韓愈常以三事疑其非至介甫
獨謂詩人所自製按東漢儒林傳曰衛宏作毛詩叙

善得風雅之旨隋經籍志曰先儒相承謂毛詩序子夏所創毛公及衛公所潤益愈之言蓋本於此韓詩序茅苴曰傷夫也漢廣曰悅人也序若詩人所自製毛詩猶韓詩也不應不同若是况文意繁雜其不出一人之手甚明不知介甫何以言之殆臆論也漢鄭康成箋

毛詩正義四十卷

右唐孔穎達等撰據劉炫劉焯疏為本刪其所煩而增其所簡云

韓詩外傳十卷

右漢韓嬰撰嬰燕人其書漢士本十篇內傳四外傳六隋止存外傳折十篇其及經蓋寡而遺說往往見於他書如逶迤郁夷之類其義與毛詩不同此書稱外傳雖非其解經之深者然文辭清婉有先秦風

詩譜一卷

右漢鄭玄康成撰歐陽永叔補完之

毛詩草木鳥獸蟲疏二卷

右吳陸璣撰或題曰陸機非也璣仕至烏程令

新經毛詩義二十卷

右皇朝熙寧中置經義局撰三經義皆本王安石說

毛詩先命王雱訓其辭復命安石訓其義書成以賜太學布之天下以取士云

蘇氏詩解二十卷

右皇朝蘇轍子由撰其說以毛詩序為衛宏作非孔氏之舊止存其首一言餘皆刪去按司馬遷曰周道缺而關雎作揚雄曰周康之時頌聲作乎下關雎作乎上與今毛詩序之意絕不同則知序非孔氏之舊明矣雖然若去序不觀則詩之辭有溟滓而不可知者不得不存其首之一言也

伊川詩說兩卷

右皇朝程頤正叔門人記其師所談之經也

陳氏詩解二十卷

右皇朝陳少南撰

歐陽詩本義十五卷

右皇朝歐陽脩永叔撰歐陽公解詩毛鄭之說已善者因之不改至於質諸先聖則悖理放於人情則不可行然後易之故所得比諸儒最多但平日不信符命嘗著書以周易河圖洛書爲妖妄今又以生民玄鳥之詩爲怪說蘇子瞻曰帝王之興其受命之符卓然見於詩書者多矣河圖洛書玄鳥生民之詩豈可

謂誣也哉恨學者推之太詳流入讖緯而後之君子亦矯枉過正舉從而廢之以爲王莽公孫之流緣此作亂使漢不失德莽述何自起而歸罪三代受命之符亦過矣

禮類

周禮十二卷

右鄭玄注漢武帝時河間獻王開獻書之路得周官有五篇失冬官一篇乃募以千金不得取考工記以補其闕至孝成時劉歆校理祕書始得序列著于錄略爲衆排棄歆獨以爲周公致太平之迹永平時杜

子春初能通其讀鄭衆鄭興亦嘗傳受玄皆引之以
參釋異同云大夫者興也司徒者衆也

儀禮十七卷

右鄭氏注西漢諸儒得古文禮凡五十六篇高堂生
博士禮十七篇為禮儀喪服傳一卷子夏所為其說
曰周禮為本聖人體之儀禮為末聖人履之為本則
重者在前故宗伯序五禮以吉凶賓軍嘉為次為末
則輕者在前故禮儀先冠昏後喪祭唐韓愈謂文王
周公法制粗在於是恨不及其時進退揖遜于其間云

禮記二十卷

右漢戴聖纂鄭康成注聖即所謂小戴者也此書乃孔子沒後七十子之徒所共錄中庸孔伋作緇衣公孫尼子作王制漢文帝時博士作河間獻王集而上之劉向校定一百五十篇大戴既刪八十五篇小戴又刪四十六篇馬融傳其學又附月令明堂義合四十九篇唐孝明刪月令移第一 皇朝以禮記不刊之書改正復爲第五議者謂經禮三百曲禮三千毋不敬一言足以蔽之故先儒以爲首孝明肆情變亂其無謂也復之當矣

大戴禮記十三卷

右漢戴德纂亦河間王所獻百三十一篇劉向校定
又得明堂陰陽記三十三篇德刪其煩重爲八十五
篇今書止四十篇其篇目自三十九篇始無四十三
四十四四十五六十一四篇有兩七十四蓋因舊缺
錄之每卷稱今卷第幾題曰九江太守戴德撰按九
江太守聖也德爲信都王太傅蓋後人誤題

三禮義宗三十卷

右梁崔靈恩撰一百五十二篇今此本頗殘缺

周禮疏四十卷

右唐賈公彥撰公彥洛州人永徽中仕至太學博士

著周禮疏四十卷今併為十二卷

儀禮疏五十卷

右唐賈公彥撰齊黃慶隋李孟哲各有疏義公彥刪
二疏為此書

禮記疏七十卷

右唐孔穎達等直觀中奉詔撰其序稱大小二戴共
氏而分門王鄭兩家同經而異注爰從晉宋逮于周
隋傳禮業者江左尤盛其為義疏者甚多唯皇甫侃
熊安生見于世然皇氏為勝今據以為本其不備以
熊氏補焉

禮記外傳四卷

右唐成伯璠撰義例兩卷五十篇名數兩卷六十九篇雖以禮記爲目通以三禮言之劉明素序張幼倫注

三禮圖二十卷

右聶崇義周世宗時被旨撰以鄭康成阮護等六家圖刊定 皇朝建隆中奏之實儼爲之序

明道中庸解一卷

右皇朝程顥撰陳瓘得之江濤江濤得之曾天隱天隱得之傅才孺才孺去李丙所藏也

芸閣禮記解四卷

右皇朝呂大臨與叔撰與叔師事程正叔禮學甚精博中庸大學尤所致意也

編禮三卷

右皇朝呂大臨與叔編以士喪禮爲本取三禮附之自始死至祥練各以類分其施於學甚惠尚恨所編者五禮中特凶禮而已

新經周禮義二十二卷

右皇朝王安石介甫撰熙寧中設經義局介甫自爲周官義十餘萬言不解考工記按秦火之後周禮比

他經最後出論者不一獨劉歆稱爲周公致太平之迹鄭氏則曰周公復辟後以此授成王使居洛邑治天下林孝謂之黷亂不驗之書何休亦云六國陰謀之說昔北宮錡問孟子周室班爵祿之法孟子以謂諸侯惡其害已滅去其籍則自孟子時已無周禮矣况經秦火乎漢儒非之良有以也不知劉鄭何所據而言然又自違異不同王莽嘗取而行之歛財聚貨瀆祀煩民冗猝詭異離去人情遠甚施於文則可觀措於事則難行凡莽之馴致大亂者皆其所致厥後唯蘇綽王通善之諸儒未嘗有言者至於介甫以其

書理財者居半愛之如行青苗之類皆稽焉所以自
釋其義者蓋以其所創新法盡傳著經義務塞異議
者之口後其黨蔡卞蔡京紹述介甫期盡行周禮焉
園土方田皆是也周姬姓故其女曰王姬舍其周姓
其臣如宋齊之女亦不曰姬而各氏其姓曰姜氏曰
子氏趙嬴姓京乃命帝女稱帝姬噫至於姓亦從焉
何其甚也父之禍難並起與莽曾無少異殆書所謂
與亂同事也邪

中庸篇一卷

右族父參事公撰近世學者以中庸爲二事其說是

書皆穿鑿而二之於是本諸胡先生司馬溫公程明道張橫渠王肅鄭玄作傳焉

游氏中庸解一卷

右皇朝游酢定夫撰酢亦程正叔門人

楊中立中庸解一卷周禮辨疑一卷

右皇朝楊時中立撰時載程正叔之言曰不偏之謂中不易之謂庸蓋亦猶王氏之說也周禮辨疑其如辨詩書者也

周公謚法一卷

右其序曰維周公旦太公望相嗣王發建功于牧野

及終將葬乃制謚計一百九十餘條云謚隋志附於
論語類中今遷于此

春秋謚法一卷

右與周公謚法相類而小有異同

沈賀謚法四卷

右梁沈約撰凡七百九十四條賀琛又加婦人謚二
百三十八條

嘉祐謚法三卷

右皇朝蘇洵明允撰洵嘉祐中被詔編定周公春秋
廣謚沈約賀琛各家謚法於是講求六家外採

今文尚書汲冢師春蔡邕獨斷凡古人論謚之書收其所長加以新意得一百六十八謚三百一十一條芟去者百九十有八又爲論四篇以叙其去取之意

樂類

樂府雜錄一卷

右唐段安節撰記唐開國以來雅鄭之樂并其事始古之爲國者先治身故以禮樂之用爲本後世爲國者先治人故以禮樂之用爲末先王欲明德於天下深惟其本必先修身而修身之要在乎正心誠意故禮以制其外樂以養其內使內之不貞之心無自而

萌外之不義之事無由而蹈一身既修而天下治矣
是以禮樂之用不可湏臾離也後世則不然設法造
令務以整治天下自適其暴戾恣睢之心謂躬行率
人爲迂闊不可用若海內平定好名之主然後取禮
之威儀樂之節奏以文飾其治而已則其所謂禮樂
者實何益於治亂成敗之數故曰後世爲國者先治
人以禮樂之用爲末雖然禮文在外爲易見歷代猶
不能廢至於樂之用在內微密要眇非常情所能知
故自漢以來指樂爲虛器雜以鄭衛夷狄之音雖或
用於一時旋即放失無復存者况其書哉今裒集數

種姑以補書目之闕爾

羯鼓錄一卷

右唐南卓撰述鼓曲故事

補亡樂書三卷

右皇朝房庶撰古律既亡後世議樂者縱黍爲之則尺長律管容黍爲有餘王朴是也橫黍爲之則尺短律管容黍爲不足胡瑋是也故庶欲先以一千二百黍納之於律管中黍盡乃得九十分爲黃鍾之長其說大要以律生尺耳范蜀公本之以製雅樂

五音會元圖一卷

右未知何人所撰謂樂各有譜但取策譜為圖以七音十二律使俗易曉

大晟樂府雅樂圖一卷

右皇朝政和中建大晟樂府起黃鍾于上躬之中指弃塞古今諸儒異同之論此其譜也

琴峯十卷

右皇朝苟以道撰記造琴法彈琴訣并譜

昭德先生郡齋讀書志卷第一上

昭德先生郡齋讀書志卷第二下

春秋類

春秋經傳集解三十卷

右晉杜預元凱集劉子駿賈景伯父子許惠卿穎子嚴之注分經之年與傳之年相附其發明甚多古今稱之然其弊則棄經信傳如成公十三年麻隧之戰傳載秦敗績而經不書以爲晉直秦曲則韓役書戰時公在師復不湏告克獲有功亦無所諱於左傳之例皆不合不曰傳之謬而猥稱經文闕漏其尤甚者至如此

春秋公羊傳十三卷

右戴宏序云子夏傳之公羊高高傳其子平平傳其子地地傳其子敢敢傳其子壽至漢景帝時壽乃與弟子胡毋子都著以竹帛其後傳董仲舒以公羊顯于朝又四傳至何休爲經傳集詁其書遂傳鄭玄曰公羊明讖休注引讖最多

春秋穀梁傳十二卷

右范甯注應劭風俗通稱穀梁名赤子夏益字糜信則以爲秦孝公同時人阮孝緒則以爲名倣字元始皆未詳也自孫卿五傳至蔡千秋漢宣帝好之遂盛

行于世自漢魏以來爲之註解者有尹更始唐固糜
信孔演江熙等十數家而范甯皆以爲膚淺於是帥
其長子參中子雍小子凱從弟邵及門生故吏商略
名例博采諸儒同異之說成其父汪之志嘗謂三傳
之學穀梁所得最多諸家之解范甯之論最善甯字
武子

春秋外傳國語二十一卷

右魯左丘明撰吳韋昭弘嗣集鄭衆賈逵虞翻唐固
四家說成此解 皇朝宋庠爲補音三卷班固藝文
志有國語二十一篇隋志云二十二卷唐志云二十

一卷今書編次與漢志同蓋歷代儒者析簡併篇互有損益不足疑也要之藝文志案吳陸淳謂與左傳文體不倫定非一人所爲蓋未必然范甯云左氏富而艷韓愈云左氏浮夸今觀此書信乎其富艷且浮夸也非立明而誰柳宗元稱越語尤奇峻豈特越哉自楚以下類如此

春秋繁露十七卷

右漢董仲舒撰史稱仲舒說春秋事得失聞舉玉杯繁露清明竹林之屬數十篇十餘萬言皆傳於後世今溢而爲八十二篇又通名繁露皆未詳隋唐卷目

與今同但多訛舛

春秋釋例十五卷

右晉杜預撰凡四十部集左傳諸例及地名譜弟曆數皆顯其同異從而釋之發明尤多昔人稱預爲左氏忠臣而預自以爲有傳癖觀此尤信

左氏膏肓九卷

右漢何休撰休始答賈逵事因記左氏之短鄭康成嘗著膏肓後人附之逐章之下

春秋正義三十六卷

右唐孔穎達撰自杜預專治左氏學其後沈文何蘇

寬劉炫皆有義疏而炫性矜伐雅好非毀規杜氏之失一百五十餘事義特淺近然比諸家猶有可觀今書據以為本而以沈氏補其闕焉

春秋公羊疏三十卷

右不著撰人李獻民云徐彥撰以何氏三科九旨為宗本其說曰何氏之意三科九旨正是一事爾總而言之謂之三科析而言之謂之九旨新周故宋以春秋當新王此一科三旨也所見異辭所聞異辭所傳聞異辭此二科六旨也內其國而外諸夏內諸夏而外夷狄此三科九旨也

盧全春秋摘微四卷

右唐盧全撰其經解不用傳然旨意甚疎韓愈謂春秋三傳束高閣獨抱遺經究終始蓋實錄也祖無擇得之於金陵崇文摠目所不載

春秋微旨六卷

右唐陸淳伯同撰淳吳人纂三傳不同擇其善者資以啖助趙匡之說助字叔佐閩人匡字伯修天水人微旨自爲序予嘗學春秋閱古今諸儒之說多矣大抵啖趙以前學者皆顯門名家苟有不通寧言誤其失也固陋啖趙以後學者喜援經繫傳其或未明則

憑私臆決其失也穿鑿均之失聖人之旨而穿鑿者之害爲甚

春秋折衷論三十卷

右唐陳岳撰以左氏傳爲上公羊爲中穀梁傳爲下比其異同而折中之岳唐末從鍾傳辟爲江西從事春秋會義二十六卷

右皇祐間進士杜諤集釋例繁露規過膏肓先儒同異篇指掌碎玉折衷指掌議纂例辨疑微旨摘微通例胡氏論箋義摠論尊王發微本旨辨要旨要集議索隱新義經社三十餘家成一書其後仍斷以己意

雖其說不皆得聖人之旨然使後人博觀古今同異之說則於聖人之旨或有得焉

春秋正經一卷

右以左氏經爲本其與公穀不同者注于下

春秋世系一卷

右不著撰人姓名譜左氏諸國君臣世系獨秦無世臣

春秋尊王發微十二卷

右皇朝孫明復撰史臣言明復治春秋不取傳註其言簡而義詳著諸大夫功罪以考時之盛衰而推見

治亂之迹故得經之意爲多常秩則譏之曰明復爲
春秋猶商鞅之法棄灰于道者有刑步過六尺者有
誅謂其失於刻也胡安國亦以秩之言爲然

春秋集傳十五卷

右皇朝王泌撰三傳解經之文

春秋權衡十七卷春秋意林二卷春秋劉氏
傳十五卷

右皇朝劉敞原父撰權衡論三傳之失意林叙其解
經之旨劉氏傳其所解經也如柏無王季友卒齊命
用郊之類皆古人所未言

黎氏春秋經解

右皇朝黎錞希聲撰錞蜀人歐陽公之客名其書爲經解者言以經解經也其後又爲統論附焉

橫渠春秋說一卷

右皇朝張載子厚撰爲門人雜說春秋其書未成

穎濱春秋集傳十二卷

右蘇轍子由撰大意以世人多師孫復不復信史故盡棄三傳全以左氏爲本至其不能通者始取二傳啖趙自熙寧謫居高安至元符初十數年矣暇日輒有改定卜居龍川而書始成

劉質夫春秋五卷

右皇朝劉絢質夫撰絢學於二程之門伯淳嘗語人曰他人之學敏則有矣未易保也斯人之至吾無疑焉正叔亦曰游吾門者多矣而信之篤得之多行之果守之固君子者幾希有李參序

得法忘例論三十卷

右皇朝馮正符所撰熙寧八年何郟取其書奏之而久之不報意者王安石不喜春秋故也其書例最詳悉務通經旨不事浮辭後坐鄧綰陳阜甫語言被斥

繹聖傳十二卷

右皇朝任伯兩德翁所撰解經不甚通例如解桓十三年二月公會紀侯鄭伯已巳及齊侯宋公衛侯燕人戰齊師宋師衛師燕師敗績取穀梁之說戰稱人敗績稱師重衆之說殊不知齊人伐衛衛人及齊人戰衛人敗績何獨不重衆也

胡氏春秋傳三十卷

右皇朝胡安國被旨撰安國師程頤其傳春秋事按左氏義取公穀之精者採孟子莊周董仲舒王通邵堯夫程明道張橫渠程正叔之說以潤色之其序略曰近世推隆王氏新說按爲國是獨於春秋貢舉不

以取士庠序不以設官經筵不以進讀斷國論者無以折衷天下不知所適人欲日長天理日消其効使夷狄亂華莫之遏也

王氏春秋十二卷

右皇朝王當撰當眉山入嘗為春秋列國諸臣傳十餘萬言今又釋春秋真可謂有志矣

馮氏春秋通解十二卷

右皇朝馮山字允南撰普州人澥之父也

春秋新傳十二卷

右皇朝余安行撰采左氏公羊穀梁及諸家之得失

參以已意爲之

春秋指南十卷

右吳園先生張根知常撰以征伐會盟年經而國緯
汪藻爲之序

四家春秋集解二十五卷

右或人集 皇朝師協石季長王棐景先之解爲一
通具載本文

非國語兩卷

右唐柳宗元子厚撰序去左氏國語其文深閎傑異
而其說多評淫懼學者溺其文采而淪於是非本諸

理作非國語上卷三十一篇下卷三十六篇

春秋列國諸臣傳五十一卷

右皇朝王當撰類左氏所載列國諸臣事効司馬遷
爲之傳凡一百三十四人系之以贊去

左氏綱領四卷

右皇朝文濟道撰排比事實爲儷句蒙求之類也

左氏蒙求三卷

右皇朝王舜俞序不知何人所作過於綱領者

春秋機括一卷

右皇朝沈括存中撰春秋機括也

春秋纂例十卷

右唐陸淳撰其序云啖氏制統例分疏通會其義趙氏損益多所發擢今纂而合之凡四十篇

孝經類

孝經一卷

右漢初顏芝之子貞獻于朝千八百七十二字唐玄宗註序稱取王肅劉邵虞翻韋昭劉炫陸澄六家說約孔鄭舊義爲之何休稱子曰吾志在春秋行在孝經信斯言也則孝經乃孔子自著者也今其首章云仲尼居曾子侍則非孔子所著明矣詳其文義當是

曾子弟子所爲書也柳宗元謂論語載弟子必以字
獨曾參不然蓋曾氏之徒樂正子春子思與爲之耳
余於孝經亦去

孝經正義三卷

右皇朝邢昺等撰世傳孝經疏外餘家尚多咸平中
昺集說爲此書

孝經解一卷

右皇朝王安石介甫撰經六當不義則子不可不諍
於父而孟子猥曰父子之間不責善夫豈然哉今介
甫因謂當不義則諍之非責善也噫不爲不義卽善

也阿其所好以巧慧侮聖人之言至此君子疾夫

古文孝經指解一卷

右古文二十二章與尚書同出於壁中蓋孔惠所藏者與顏芝十八章大較相似而析出三章又有闕門一章不同者四百餘字劉向校書以十八章爲定故世不大傳獨有孔安國注今亡然諸家說不安處古文字讀皆異推此言之未必非真也 皇朝司馬文正公爲之指解并音

古文孝經說一卷

右皇朝范祖禹夢得撰元祐中侍經幄時所上

論語類

論語十卷

右魏何晏集解其序自云據魯論包氏周氏孔安國
馬融鄭康成陳群王肅周生烈八家之說與孫邕鄭
同曹羲荀頴集諸家訓解爲之按時論語凡有三而
齊論有問王知道兩篇詳其名是必論內聖之道外
王之業未必非夫子之最致意者不知何說而張禹
獨遺之禹身不知王鳳之邪正其不知此固宜然勢
位足以軒輊一世使斯文遂喪惜哉鄭同名觸先公
諱司馬遷父名談以趙談子爲同子故子亦去後倣此

論語正義十卷

右梁王伋

一云皇甫伋

採衛瓘蔡謨等十二家說為疏

國朝邢昺等因之撰此書

王介甫論語解十卷

右皇朝王安石甫撰紹聖後亦行於場屋

伊川論語說十卷

右皇朝程頤正叔之門人記其師所解論語也不為文辭直以俚語記之

東坡論語解十卷

右皇朝蘇軾子瞻撰子瞻沒後義有未安者其弟子

由嘗辨正之凡二十有七章

范氏論語說十卷

右皇朝范祖禹醇夫撰亦元祐中所進數稱引劉敞
程頤之說云

謝顯道論語解十卷

右皇朝謝顯道撰少常師事程正叔

景迂論語講義十卷

右從父詹事公撰多取古儒之說以正近世之失

楊氏注論語十卷

右皇朝楊時中立撰亦伊川門下士也

尹氏論語義十卷

右皇朝尹焯彥明撰彥明亦程氏門下人紹興中自布衣召爲崇政殿說書被旨訓解多采純夫之說

孔子家語十卷

右魏王肅序注凡四十四篇劉向校錄止二十七篇後肅得此於孔子二十四世孫猛家

經解類

白虎通德論十卷

右後漢章帝會群臣於白虎殿講論五經同異班固奉詔纂

七經小傳五卷

右皇朝劉敞原甫撰所謂七經者毛詩尚書公羊周禮儀禮禮記論語也元祐史官謂慶曆前學者尚文辭多守章句注數之學至敞始異諸儒之說後王安石修經義蓋本於敞予觀原甫伊尹相湯伐桀紂自師之說之類經義多勦取之史官之言良不誣也

漁樵對問一卷

右皇朝張載撰設爲答問以論陰陽化育之端性命道德之奧云

程氏雜說一卷

右皇朝程頤正叔門人記其師之言

儒言一卷

右從父詹事公撰其書蓋辨正王安石之學違僻者

三墳書七卷

右皇朝張商英天覺得之於比陽民家墳皆古文而傳乃隸書所謂三墳者山氣形也按七略不載三墳隋志亦無之世皆以爲天覺僞撰蓋以比李筌陰符經六

信聞記一卷

右皇朝張載撰雜解六經

六祖經要四卷

右皇朝任洙撰洙自言受學於呂隱君凡五十門皆
數學也

小學類

爾雅三卷

右世傳釋詁周公書也仲尼子夏叔孫通梁文增補
之晉郭璞注文字之學凡有三其一體制謂點畫有
衡縱曲直之殊其二訓詁謂稱謂有古今雅俗之異
其三音韻謂呼吸有清濁高下之不同論體制之書
說文之類是也論訓詁之書爾雅方言之類是也論

音韻之書沈約四聲譜及西域反切之學是也三者雖各一家其實皆小學之類而藝文志獨以爾雅附孝經類經籍志又以附論語類皆非是今依四庫書目置于小學之首

爾雅疏十卷

右舊有孫炎高璉疏 皇朝以其淺略命邢昺杜鎬等別著此書

方言三卷

右漢楊雄子雲撰晉郭璞注雄齊油素問上計孝廉異語悉集之題其首曰輜軒使者絕代語釋別國

方言

玉篇三十卷

右梁顧野王撰唐孫彊又嘗增字僧神珙反紐圖附
于後

廣韻五卷

右隋陸法言撰其後唐孫愐加字凡四萬三千三百
八十三前有法言長孫訥孫愐三序

經典釋文三十卷

右唐陸德明撰釋易書詩三禮三傳孝經論語爾雅
老莊頗載古文及諸家同異德明蓋博極群書也

群經音辨七卷

右皇朝賈昌朝撰先是大臣稽古不過秦漢引經議政蓋自昌朝始此書以古今多通借音詁乃辨正之凡五門

禮部韻略五卷

右皇朝丁度等撰元祐中孫諤蘇軾再加詳定

類篇四十九卷

右皇朝景祐中丁度受詔修類篇至熙寧中司馬光始奏音文三萬一千三百一十九重音二萬一千八百四十六以說文爲本

集韻十卷

右皇朝丁度季淑與宋祁鄭戩王洙賈昌朝同定字
五萬三千五百二十五比舊增二萬七千三百二十一
龍龕手種三卷

右契丹僧行均撰凡二萬六千四百三十字注十六
萬二千一百餘字僧智光爲之後題去統和十五年
丁酉按紀年通譜邪律隆緒嘗改元統和丁酉至道
三年也沈存中言契丹書禁甚嚴傳入中國者法皆
死熙寧中有人自虜中得此書入傳欽之家蒲傳正
帥浙西取以刻板其末題去重熙二年序蒲公削去

之今本乃玄統和非重熙豈存中不見舊題妄記之邪

佩觿三卷

右皇朝郭忠恕撰上篇論古今傳記小學異同極爲
辨博

切韻指玄論三卷

右皇朝王宗道撰論字之五音清濁

四聲等第圖一卷

右皇朝僧宗彥撰切韻之訣也

說文解字十五卷

右漢許慎纂李陽冰判定偽唐徐鉉再是正之又增

加其闕字

字說二十卷

右皇朝王安石介甫撰蔡卞謂介甫晚年閒居金陵以天地萬物之理著爲此書與易相表裏去而元祐中言者指其糅雜釋老穿鑿破碎聳聳學子者特禁絕之

陸氏埤雅二十卷

右皇朝陸佃農師撰書載虫魚鳥獸草木名物喜採俗說然王安石客也而其學不專主王氏亦特喜者字說偏傍音釋一卷字說壘解備檢一卷

右不見撰人姓名

押韻六卷

右皇朝張孟撰緝六藝諸子三史句語依韻編入以備舉子試詩賦之用

復古編三卷

右皇朝張守謙中撰守自幼喜小篆年六十成此書三千言據古說文以爲正其點畫之微轉側縱橫高下曲直毫髮有差則形聲頓異自陽冰前後各人格以古文徃徃而失其精且博如此

鍾鼎篆韻七卷

右皇朝薛尚功集元祐中呂大臨所載僅數百字政
和中王楚所傳亦不過數千字今是書所錄凡一萬
一百二十有五

淳化法帖十卷

右皇朝淳化中出禁中所藏歷代君臣書命刊之板
後大臣二府皆以賜焉歐陽公去徃時禁中火焚其
板或云尚在但不賜爾

武陵法帖二十二卷

右皇朝王若谷以祕閣法帖合潭絳臨江汝海諸帖
參校有無補其遺逸成是書昇平張斛刊之石

法帖釋文十卷

右淳化法帖既已焚板元祐中有劉次莊者模刻之
石復取帖中草書世所病讀者爲釋文行於世

考古圖十卷

右皇朝呂大臨與叔撰袁諸家所藏三代秦漢尊彝
鼎敦之屬繪之于幅而辨論形制文字

博古圖二十卷

右皇朝王楚集三代秦漢彝器繪其形範辨其款識
增多呂氏考古十倍

鍾鼎款識二十卷

右皇朝薛尚功編考古博古之類然猶爲詳備

博雅十卷

右隋曹憲撰魏張揖嘗採蒼雅遺文爲書名曰廣雅
憲因揖之說附以音解避煬帝諱更之爲博古後有
張揖表

昭德先生郡齋讀書志卷第一下

昭德先生郡齋讀書志卷第二左氏明紀傳者分記
史部其類十有三一曰正史類遷實錄者近起於唐
錄類四曰雜史類五曰僞史類官採擇而已初無制
官類八曰儀注類九曰刑法類則各有所長殆未易
傳記類十二曰譜牒類十三曰目錄類後世述史者
其體有三編年者以事繫日月而總之於年蓋本於
左氏明紀傳者分記君臣行事之終始蓋本於司馬
遷實錄者近起於唐雜取兩者之法而爲之以備史
官採擇而已初無制作之意不足道也若編年紀傳
則各有所長殆未易以優劣論雖然編年所載於一

國治亂之事爲詳紀傳所載於一人善惡之迹爲詳用此言之編年似優又其來最古而人皆以紀傳便於披閱獨行於世號爲正史不亦異乎舊以職官儀注等凡史氏有取者皆附之史今從焉

正史類

史記一百三十卷

右漢太史令司馬遷續其父談書創爲義例起黃帝迄漢武獲麟之歲撰成十二紀以序帝王年表以貫歲月八書以紀政事二十世家以序公侯七十列傳以志士庶上下三千餘載凡爲五十二萬六千五百

言遷沒後缺景武紀禮樂律書三王世家漢興以來
將相年表日者龜策傳斬荊列傳等十篇元成間褚
少孫追補及益以武帝後事辭旨淺鄙不及遷書遠
甚裴駟集解班固嘗譏遷論大道則先黃老而後六
經序游俠則退處士而進姦雄述貨殖則崇勢利而
羞貧賤後世愛遷者以此論爲不然謂遷特感當世
之所失憤其身之所遭寓之於書有所激而爲此言
耳非其心所謂誠然也當武帝之世表章儒術而罷
黜百家宜乎大治而窮奢極侈海內彫弊反不若文
景尚黃老時人主恭儉天下饒給此其論大道所以

先黃老而後六經也武帝用法刻深群臣一言忤旨輒下吏誅而當刑者得以貨自贖遷之遭李陵之禍家貧無財賄自贖交遊莫救卒陷腐刑其序游俠退處士而進姦雄者蓋遷歎時無朱家之倫不能脫已於禍故曰士窮窘得委命此豈非人所謂賢豪者邪其述貨殖崇勢利而羞貧賤者蓋遷自傷特以貧故不能自免於刑戮故曰千金之子不死於市非空言也固不察其心而驟譏之過矣

前漢一百卷

右後漢玄武司馬班固續司馬遷史記撰十二帝紀

八年表十本志七十列傳起高祖終於王莽之誅二百三十年凡八十餘萬字固旣瘦死書頗散亂章帝令其妹曹世叔妻昭就東觀緝校內八表天文志皆其補也唐太子承乾令顏師古考衆說爲之注范曄譏固飾主闕蓋亦不然其贅多微文顧讀者弗察耳劉知幾又詆其古今人物表無益於漢史此論誠然但非固之罪也至謂受金鬻筆固雖諂附匪人亦何至是歟然識者或以固書皆因司馬遷王商揚雄歆向舊文潤色成之故其文章首尾皆善而中間頗冗瑣良由商之才視數子微劣尔固之自序稱述者亦

謂有所本也

後漢九十卷志三十卷

右宋范曄撰十帝紀八十列傳唐高宗令章懷太子賢與劉丙言韋希言作註曄所撰本志未成而伏誅後劉昭補注三十卷觀曄與甥姪書叙其作書之意稱自古體大而思精未有如此者又謂諸序論筆勢放縱實天下之奇作往往不減過秦篇常以比方班氏非但不愧之而已其自負如此然世多譏曄創爲皇后紀及采風俗通中王喬抱朴子中左慈等詭譎事列之於傳又贊辭佻巧失史之體云

三國志十五卷

右晉陳壽撰魏四紀二十六列傳蜀十五列傳吳二十列傳宋文帝嫌其略命裴松之補注博采群說分入書中其多過本書數倍王通數稱壽書細觀之實高簡有法如不言曹操本生而載夏侯惇及淵於諸曹傳中則見嵩本夏后氏之子也高貴鄉公書卒而載司馬昭之奏則見公之不得其死也他皆類此但以魏爲紀而稱漢吳曰傳又改漢曰蜀世頗譏其失至於謂其銜諸葛孔明髡父而爲貶辭求丁氏之米不獲不立儀廩傳之類亦未必然也

晉書一百三十卷

右唐房喬等撰貞觀中以何法盛等十八家晉史未善詔喬與褚遂良許敬宗再加撰次乃據臧榮緒書增損之後又命李淳風李義府李延壽等十三人分掌著述敬播等四人考正類例西晉四帝五十四年東晉十一帝一百二年又胡羯氏羗鮮卑割據中原爲涼四燕二趙夏蜀十六國共成帝紀十志二十列傳七十載記三十例出播天文律歷淳風專之喬以宣武紀陸機王羲之傳論上所自爲故曰制旨又總題御撰焉按歷代之史唯晉叢冗最甚可以無譏然

其多采語林世說幽明錄搜神記詭異繆妄之言至於取沈約之說誣元帝爲牛氏子之類亦不可不辨

宋書一百卷

右梁沈約撰十本紀三十志六十列傳齊永明中約奉詔爲是書以何承天書爲本兼採徐爰之說頗爲精詳但本志兼載魏晉失於限斷又王邵謂其喜造竒說以誣前代如琅琊王妃通小史牛氏生子孝武於路太后處寢息時人多有異議之類是也後梁武帝知而不以爲非嘉祐中以宋齊梁陳魏北齊周書并繆亡缺始命館職讎校曾鞏等以祕閣所藏多誤

不足憑以是正請詔天下藏書之家悉上異本文之
始集治平中鞏校定南齊梁陳三書上之劉恕等上
後魏書王安國上周書昝和中始皆畢頒之學官民
間傳者尚少未幾遭靖康丙午之亂中原淪陷此書
幾亡紹興十四年井憲孟爲四川漕始檄諸州學官
求當日所頒本時四川五十餘州皆不被兵書頗有
在者然徃徃亡缺不全收合補綴獨少後魏書十許
卷最後得宇文季蒙家本偶有所少者於是七史遂
全因命眉山刊行

南齊書五十九卷

右梁蕭子顯撰八紀十一志四十列傳初江淹已作十志沈約又有紀子顯自表別修然天文但紀災祥州郡不著戶口祥瑞多載圖識表去事祕戶口不知不敢私載曾子固謂子顯於斯史喜自馳騁其更改破折刻雕藻績之變尤多而文比七史最下去

梁書五十六卷

右唐姚思廉撰六本紀五十列傳唐貞觀三年詔思廉同魏徵撰思廉者梁史官察之子推其父意又採謝吳等所記以成此書徵唯著摠論而已

陳書三十六卷

右唐姚思廉撰六本紀三十列傳其父察在陳嘗刪
撰梁陳事未成陳亡隋文帝問之察以所論載每一
篇成輒奏之未訖而沒察且死屬思廉繼其業貞觀
中與梁書同上之其書世亦罕傳故多脫誤

後魏書一百三十卷

右北齊魏收撰初魏史官崔浩既誅太和後始有李
彪崔鴻等書魏末山偉綦雋更主國書二十餘年事
迹蕩然萬不紀一文宣時詔收撰次成十二紀十志
九十二列傳上之悉焚舊書多諂諱不平受尔朱榮
子金故減其惡夙有怨者多沒其善蓋此朝貶江左

爲島夷至謂晉元帝爲牛金之子時人疾之號爲穢
史劉知幾謂其生絕胤嗣死逢剖斷皆陰慝所致後
隋文帝顏之推等別修唐貞觀中陳叔達亦作五代
史皆不傳獨收書在 皇朝俞鉉劉恕等校正

北齊書五十卷

右唐李百藥撰本紀八列傳四十二百藥父德林在
齊嘗撰著紀傳貞觀初詔分修諸史百藥因父書世
祖世宗之類

周書五十卷

右唐令狐德棻等撰本紀八列傳四十二貞觀中德

蔡請撰次而詔德蔡與陳叔達唐儉成之先是蘇綽
秉周政軍國詞令多准尚書牛弘為史尤務清言德
蔡因之以成是書故多非實錄仁宗時出太清樓本
合史館祕閣本又募天下獻書而取夏竦李巽家本
下館閣是正其文字而後林希王安國上之

隋書八十五卷

右唐魏徵等撰紀五列傳五十五長孫無忌等撰志
三十初詔顏師古孔穎達修述徵摠其事序論皆徵
自作後又詔于志寧李淳風韋安仁李延壽同修五
代史志無忌上之詔編第入隋書人亦號五代史志

天文律歷五行三志洎風獨作

唐書二百卷

右石晉劉昫張昭遠等撰因韋述舊史增損以成繁
略不均校之實錄多所漏闕又是非失實其甚至以
韓愈文章爲大紕繆故

仁宗刪改蓋亦不可已焉

新唐書二百二十五卷

右皇朝嘉祐中曾公亮等被詔刪定歐陽脩撰紀志
宋祁撰列傳舊者約一百九十萬新書約一百七十
四萬而其中增表故書成上於朝自言曰其事則增

於前其文則省於舊也而議者頗謂永叔學春秋每務褒貶子京通小學唯刻意文章采雜說既多徃徃抵牾有失實之歎焉

五代史記七十五卷

右皇朝歐陽脩永叔以薛居正史繁猥失實加修定藏于家永叔沒後朝廷聞之取以付國子監刊行國史稱其可以繼班固劉向人不以為過特恨其晉出帝論以為因濮園議而發也

三朝國史一百五十卷

右皇朝呂夷簡等撰初景德四年詔王旦先文元公

楊億等十人撰 太祖太宗兩朝史至天聖五年詔
夷簡等九人添入

眞宗朝史王曾監修曾罷夷簡代八年書成

編年類

荀悅漢紀三十卷

右漢荀悅撰班固作漢書起高祖終于孝平王莽之
十二世二百四十二年爲紀表志傳凡八十餘萬言
獻帝以其文繁詁艱要撮摠通比其事列繫年月爲
紀三十篇凡八萬三千四百三十二字辭約事該時
稱嘉史

袁宏漢紀三十卷

右晉袁宏彥伯在晉末爲一時文宗性強直雖爲相
溫禮遇每不阿屈以東京史籍不倫謝承司馬彪之
徒錯繆同異無所取正唯張璠紀差詳因參撫記傳
以損益之比諸家號爲精密

唐曆四十卷

右唐柳芳撰初肅宗詔芳綴緝吳兢書其叙天寶後
事不倫上元中芳謫黔中會高力士同貶因從力士
質開元天寶及禁中畢識其本時舊史已送官不可
追刊乃推衍義類做細年法作此書起隋義寧元年

迄大曆十三年然不立復貶義例而叙制度爲詳

河洛行年記十卷

右唐劉仁軌撰記唐初李密王世充事起大業十三年二月迄武德四年七月秦王擒竇建德第九卷述大業都城第十卷載宮館園圃且云煬帝遷都之詔稱務從節儉觀其宮室窮極綺麗云

大唐創業起居注三卷

右唐溫大雅撰紀高祖建義至受隋禪用師符讖受命典冊事

通曆十卷

右唐馬摠撰摠纂太古十七氏中古五帝三王及刪
取秦漢三國晉十六國宋齊梁陳元魏北齊後周隋
世紀興滅粗述其君賢否取虞世南略論分系於末
以見義焉

續通曆十卷

右荆南孫光憲撰輯唐洎五代事以續馬摠曆參以
黃巢李茂貞劉守光阿保機吳唐閩唐湖越兩蜀事
迹 太祖朝詔毀其書以其所紀多非實也

五代通錄六十五卷

右皇朝范質撰五代實錄共三百六十卷質刪其煩

文撫其要言以成是書自乾化壬申至梁亡十二年
間簡牘散亡亦採當時制勅碑碣以補其闕

紀年通譜十二卷

右皇朝宋庠撰自漢文帝後元戊寅止周恭帝顯德
庚申爲九篇以本朝建隆之元至慶曆辛巳爲一篇
皆曰統元以甲子貫之有五號曰正閏僞賊蠻夷以
王莽十九年繫孺子更始以接建武東魏十七年附
西魏豫王六年天后十五年繫中宗緒神龍朱梁十
六年通濟陰天祐續同光摺晉恭帝禪宋之歲對魏
明元泰常五年尊北降南始主正朔乃通譜之新意

也別二篇舉字爲類各部分曰類元慶曆中上之優
詔褒焉

稽古錄二十卷

右皇朝司馬光君實編起自三皇止 皇朝英宗

治平末至周共和庚申始爲編年

編年紀事十一卷

右皇朝劉攽因司馬溫公所撰編次

資治通鑑二百九十四卷目錄三十卷考異

三十卷

右皇朝治平中司馬光奉詔編集歷代君臣事迹許

自辟官屬借以館閣書籍在外聽以書局自隨至元豐七年九十七年始奏御上起戰國下終五代凡一千三百六十二年又略舉事自年經國緯以備檢閱別為目錄參考同異俾歸一塗別為考異各一編公自謂精力盡於此書

神宗賜名資治通鑑託始於周威烈王命韓趙魏為諸侯下訖五代劉恕嘗語光昌不起上古或堯舜光答以事包春秋不可又以經不可續不敢始於獲麟如意謂闕漏因撰一書起三皇五帝止周共和載其卅次而已起共和庚申至威烈王二十二年丁丑四

百三十八年爲一編號曰外紀猶國語稱春秋外傳也

實錄類

唐則天實錄二十卷

右唐吳兢撰初神龍二年詔武三思魏元忠祝欽明徐彥伯柳同崔融岑羲徐堅撰錄三十卷開元四年兢與劉知幾刊修成此書上之起嗣聖改元甲申臨朝止長安四年甲辰傳位凡二十一年

唐代宗實錄四十卷

右唐令狐峘撰初詔峘撰錄未成書最官卒元和二年子丕上之當時名臣如房琯不立傳直抗如顏真

鄉略而不載時譏漏略起寶應元年壬寅止大曆十四年己未凡十七年

唐順宗實錄五卷

右唐韓愈撰起貞元二十一年乙酉正月止永貞元年丙戌八月初愈撰錄書禁中事爲切直闡官不喜訾其非實在文宗時詔路隋刊正隋建言衆議以刊修非是李宗閔牛僧孺謂史官李漢蔣係皆愈之婿不可參撰俾臣下筆臣謂不然且愈之所書非已自出元和以來相循逮今漢等以嫌無害公誼請條其甚謬誤者付史官刊定詔擿去元和永貞間數事爲

失實餘不復改

唐敬宗實錄十卷

右唐李讓夷等撰起長慶四年甲辰即位止寶曆二年丁未凡三歲武宗會昌中詔史官陳商鄭亞同修讓夷監修書成上之

建康實錄二十卷

右唐許嵩撰始自吳起漢興平元年終於陳末禎明三年南朝六代四百年間君臣行事及土地山川城池宮苑制置興壞田疇古跡其有異事則注之以益見聞建康者六朝所都地名也

太祖實錄五十卷

右皇朝李沆等撰起建隆元年庚申止開寶九年丙子十月咸平中 眞宗以前錄漏落詔錢若水王禹偁李宗諤梁顥趙安仁重加刊修呂端監修端罷沆代二年書成上之沆表云前錄天造之始國姓之源發揮無取削平諸國僭主僞臣頗亡事迹今之所正率由典章又益諸臣傳一百四人

太宗實錄八十卷

右皇朝錢若水等撰起即位止至道三年丁酉三月凡二十年至道三年詔若水柴成務宋庚吳涉楊億

同修咸平元年書成上之

眞宗實錄一百五十卷

右皇朝王欽若等撰起藩邸止乾興元年壬戌二月
凡二十六年乾興元年詔李維晏殊孫奭宋綬陳堯
佐王舉正李淑同修馮拯監修拯卒欽若代天聖二
年書成上之

仁宗實錄二百卷

右皇朝韓琦等撰起藩邸盡嘉祐八年三月凡四十
二年

英宗實錄三十卷

右皇朝曾公亮等撰錄起藩邸盡治平四年九月凡四年

神宗實錄二百卷

右皇朝呂大防等撰起藩邸止元豐八年三月凡十九年紹聖中言者謂元祐間呂大防提舉實錄范祖禹等編修刊落事跡變亂美實外應姦人詆誣之說命蔡卞改修其後奏書以舊錄爲本用墨書添入者用朱書其刪去者用黃抹已而將舊錄焚毀宣和中國得其本於禁中遂傳於民間號朱墨史云

哲宗前實錄一百卷後實錄九十四卷

右蔡京等撰前錄起藩邸盡元祐七年十二月後錄起紹聖元年正月盡元符三年正月共十三年京之意以宣仁垂簾時政非出於上故分前後錄蓋厚誣也

哲宗新實錄一百五十卷

紹興四年三月壬子 太上皇帝顧謂宰臣朱勝非等曰 神宗哲宗兩朝史錄事實多誣非所以傳信後世當重別修定著唐鑑范祖禹有子名冲者已有召命可促來今兼史事臣勝非奏曰 神宗史緣添入王安石日錄 哲宗史經蔡京蔡卞之手議論多

不公今蒙 聖諭命官刪定以昭彰 二帝盛美天下甚幸十八日丙申新除宗正少卿兼直史館范冲辭免恩命臣勝非奏曰冲謂史館專修 神宗哲宗史錄而其父祖禹元祐間任諫官後坐章疏議論責死嶺表而 神宗實錄又經祖禹之手今既重修則凡出京卞之意及其增添者不無刪改儻使冲預其事恐其黨未能厭服 上曰以私意增添不知當否臣勝非曰皆非公論 上曰然則刪之何害紛紛淨論不足卹也臣勝非曰范冲不得不以此爲辭今聖斷不移冲亦安敢有請上復愀然謂勝非等曰此

事豈 朕敢私頃歲 昭慈聖獻皇后誕辰因置酒
宮中從容語及前朝事 昭慈謂朕曰吾老矣幸相
聚於此他時身後吾復何患然有一事當為官家言
之吾逮事 宣仁聖烈皇后求之古今母后之賢未
見其比因姦臣快其私憤肆加誣謗有玷盛德建炎
初雖嘗下詔辨明而史錄所載未經刪改豈足傳信
後世吾意在天之靈不無望於官家也 朕每念及
此惕然於朝夕欲降一詔書明載 昭慈遺旨庶使
中外知 朕修史之本意臣勝非進曰 聖諭及此
天下幸甚臣仰惟 神宗哲宗兩朝實錄已上

太上皇帝聖意先定爰命宰臣悉令刪修故具載聖語於篇末云

元符庚辰以來詔旨四卷

右皇朝汪藻編 徽宗即位後詔旨未全

濮安懿王申陳一卷

紀治平中封 濮安懿王時宰相奏狀及臺諫言章
邵氏辯誣一卷

右皇朝邵伯溫撰辯蔡卞章惇邢恕誣罔 宣仁欲廢哲宗立徐邸事

雜史類

汲冢周書十卷

右晉太康中汲郡與穆天子傳同得晉孔晁注蓋孔子刪採之餘凡七十篇

吳越春秋十二卷

右後漢趙曄撰吳起太伯盡夫差越起无余盡勾踐內吳外越本未咸備

南史八十卷北史一百卷

右唐李延壽撰延壽父太師嘗謂宋齊逮周隋分隕南北南謂北爲索虜北謂南爲島夷欲改正擬吳越春秋編年未就而卒延壽後預修晉隋書因究悉舊

事更依馬遷論體總叙八代北起魏盡隋二百四十二年南起宋盡陳百七十年爲二史刪煩補闕過本史遠甚至今學者止觀其書沈約魏收等所撰皆不行獨闕本志而隋書有之故隋書亦傳于世

西京雜記二卷

右晉葛洪撰初序言洪家有劉子駿漢書百卷乃當時欲撰史錄事而未得締思無前後之次雜記而已後學者始甲乙壬癸爲十卷以其書校班史殆全取劉書耳所餘二萬許言乃抄撮之析二篇以裨漢書之闕猶存甲乙哀次江左人或以爲吳均依託爲之

五代新說二卷

右唐張洵古撰以梁陳北齊周隋君臣雜事分三十門纂次

南部煙花錄一卷

右唐顏師古撰載隋煬帝時宮中祕事僧志徹得之瓦官閣筍筆中一名大業拾遺記

大業雜記十卷

右唐杜寶撰起隋仁壽四年煬帝嗣位止越王侗皇太三年王世充降唐事

貞觀政要十卷

右吳兢撰兢以唐之極治貞觀爲最故採時政之可備勸戒者上之於朝凡四十篇

大唐新語十三卷

右唐劉肅撰輯唐故事起武德止大曆分爲二十類

明皇雜錄二卷

右唐鄭處誨撰記孝明時雜事別錄一卷題補闕所載十二事

開元傳信記一卷

右唐鄭棨撰紀開元天寶傳聞之事故曰傳信

國史補二卷

右唐李肇撰起開元長慶間事初劉餗記元魏迄唐開元事名曰國朝傳記故肇續之

幸蜀記三卷

右唐李匡文宋巨周宋居白撰初匡文記盡孝明崩巨記止於歸長安叙事之有詳略居白合二記以宋爲本折李爲注取二序冠篇復摻遺事增廣焉

次柳氏舊聞一卷

右唐李德裕撰上元中史臣柳芳與高力士同竄黔中爲芳言開元天寶年中事乃論次號問高力士李吉甫與芳子冕貞元中俱爲尚書郎嘗道力士之說

吉甫每爲其子德裕言歲祀旣久遺藁不傳但記十七事後文宗訪力士事於德裕德裕編次上之多同明皇雜錄

開成承詔錄二卷

右唐李石撰石與鄭覃李固言相文宗錄當時延英奏對事開成乃其時年號

大和辨謗略二卷

右唐李德裕撰先是唐次錄周秦迄隋忠賢罹讒謗事德宗覽之不悅後憲宗以爲善命令狐楚等廣之成十卷至大和中文成上之

兩朝獻替記三卷

右唐李德裕撰德裕相文宗武宗錄當時奏對論議
開元升平源記一卷

右唐吳兢載姚崇以十事要明皇

金鑿密記一卷

右唐韓偓撰天復中為翰林學士從昭宗西幸梁祖
以兵圍鳳翔偓每與謀議因密記之及所聞見事止
復京師偓貶去

松窓錄一卷

右唐韋叡撰記唐故事

元和朋黨錄一卷

右唐馬永易記牛李朋黨始末自牛僧孺試賢良迄令狐綯去位

中朝故事二卷

右偽唐尉遲偓撰記唐懿昭哀三朝故事故曰中朝入洛記一卷

右蜀王仁裕隨王行降入洛陽記往返塗中事并其所著詩賦

南部新書五卷

右皇朝錢希白撰記唐故事

建隆遺事一卷

右皇朝王禹偁記 太祖事十按 太祖開寶九年十月癸丑崩于萬歲殿先是趙普以六年罷爲河陽節度使盧多遜至太平興國元年始除平章事太祖崩時宰臣蓋薛居正沈倫也今此云 上將晏駕前一日召宰相趙普盧多遜入宮其繆甚矣世多以其所記爲然恐不足信也

祖宗獨斷一卷

右皇朝陸經記 祖宗獨斷九十事

聖宗撥遺一卷

右皇朝余靖撰記國初至 仁宗君臣美事以備史闕

三朝政錄二十卷

右皇朝富弼上言欲選官置局將 三朝典故編成一書即命王洙余靖孫甫歐陽脩編修分別事類成九十六門

溫公紀聞五卷

右皇朝司馬光撰記賓客所談 祖宗及當時雜事筆錄一卷

右皇朝王曾撰皆 國朝雜事

晉公談錄三卷

右皇朝丁謂撰多本朝事每章之首皆稱晉公言不知何人爲潤益初董識志彥得之於洪州潘延之家延之晉公甥疑延之所爲

嘉祐時政記一卷

右吳奎趙槩歐陽脩記立英宗事并賈易論韓琦定策疏

富公語錄一卷

右皇朝富弼使虜時所錄

曾相手記三卷

右紹聖初元祐黨禍起曾布知公論所在故對上之

語多持兩端又輒增損以著此書云

隆平集二十卷

右皇朝曾鞏撰記 五朝君臣事蹟

建炎台曆五卷

右皇朝汪伯彥撰記 太上皇帝登極時事

五代史闕文一卷

右皇朝王禹偁撰錄五代史筆避嫌漏略者以備闕

文凡一十七事

英宗朝諸臣傳三卷

右不知何人於 英廟實錄中摘出凡四十二人

邵氏聞見錄二十卷

右皇朝邵伯溫子文撰記國朝雜事迄紹興之初序言早以其父之故親接前輩得前言往行為多類之成書其父雍也

金人背盟錄一卷

右皇朝汪藻編記金人叛契丹迄於宣和乙巳犯京城多採北遼遺事

圍城雜錄一卷

右皇朝王養正錄靖康末女真再犯都城事

順昌錄一卷

右紹興十年劉錡破女真于順昌城下其徒紀其功云
紹運圖一卷

右未詳何人所撰自伏羲迄 皇朝神廟五德之傳
及紀事皆著于篇

昭德先生郡齋讀書志卷第二上

昭德先生郡齋讀書志卷第二下

偽史類

華陽國志十二卷

右晉常璩撰華陽梁州地也記漢以來巴蜀人物呂微仲跋云漢至晉初四百載間士女可書四百人亦可謂盛矣復自晉至周顯德僅七百歲而史所紀者無幾人忠魂義骨與塵埃同沒何可勝數豈不重可歎哉

江南錄十卷

右皇朝徐鉉等撰鉉等自江南歸朝奉

詔撰集李氏時事王介甫嘗謂書至亡國之際不言其君之過但以曆數存亡論之雖有愧實錄其於春秋箕子之義得之矣雖然潘佑以直言見殺而鉉書佑死以妖妄何也殆與佑爭名且耻其善不及佑故匿其忠污之以罪耳若然豈唯厚誣忠臣其欺吾君不亦甚乎

江南別錄四卷

右皇朝陳彭年撰偽吳偽唐四主傳也

九國志五十一卷

右皇朝路振撰吳唐前蜀後蜀東漢南漢閩楚九國

蜀桂堂編事二十卷

右偽蜀楊九齡撰雜記孟氏廣政中舉試事跡始末
南唐近事二卷

右皇朝鄭文寶編紀李氏二主四十年間雜事之可
紀者

江南野史二十卷

右皇朝龍衮撰凡八十四傳

外史擣扞十卷

右皇朝張唐英次公撰序稱王建孟知祥父子四世
八十年比之公孫述輩最爲久遠其間善惡有可爲

世戒者路振之書未備今成此書以補其遺凡五代史及

皇朝日曆所書皆略之

北遼遺事二卷

右不題撰人蓋遼人也記女真滅遼事序云遼國自阿保機創業於其初德光恢廓於其後吞併諸蕃割據漢界南北開疆五千里東西四千里戎器之備戰馬之多前古未有子孫繼統二百三十餘年迨至天祚失御女真稱兵十二年間舉國土崩古人謂得之難失之易非虛言耳

金虜節要一卷

右陷虜人所上也記金人初內侮止紹興十年共十六年事頗詳實

史評類

史記索隱三十卷

右唐司馬貞撰據徐斐注糾正抵牾援據密緻如東坡辯宰我未嘗從田常爲亂蓋本諸貞也

唐書直筆四卷

右皇朝呂夏卿撰夏卿強記絕人預修新書

唐書新例須知一卷

右記新書比舊增減志傳及其總數

唐書音訓四卷

右皇朝竇苹撰

唐書辯證二十卷

右皇朝吳縝撰數新書初修之時其失有八類其舛誤二十門凡四百餘事

唐史要論十卷

右皇朝孫甫之翰撰歐陽脩司馬光蘇軾稱其書以爲舊史所不及

西漢發揮十卷

右皇朝劉涇巨濟撰蜀人

唐鑑二十卷

右皇朝范祖禹醇夫撰醇夫爲溫公通鑑局編修官十五年分掌唐史以其所自得著成此書取武后臨朝二十一年系之中宗其言曰此春秋公在乾侯之義也雖得罪於君子亦所不辭觀此則知醇夫之從公決非苟同者凡二百六篇

注唐紀十卷

右題曰樊先生而不詳其名近代人所注新書紀也

唐史評

右皇朝焦考寧撰自號適適先生

五代史纂誤五卷

右皇朝吳縝撰凡二百餘事皆五代史抵牾闕誤也

三國人物論三卷

右皇朝楊祐甫撰蜀人

歷代史辨志五卷

右未詳撰人

劉氏史通二十卷

右唐劉知幾撰知幾長安神龍間三爲史官頗不得志乃以前代書史叙其體法因習廢置掇其得失述

作曲直分內外篇著爲評議備載史策之要當時徐
堅深重其書嘗云居史職者宜置坐右玄宗朝詔其
家錄進上讀而善之宋子京稱唐舊史之文猥釀不
綱謂知幾工訶古人而拙於用已觀此書知子京之
論不誣

職官類

集賢注記一卷

右唐韋述撰樞院中故事脩撰書史之次孝明時學
士名氏

御史臺記十二卷

右唐韓琬撰載唐初至開元御史臺中制度故事以大夫中丞侍御史殿中監察主簿錄事分門載次名行事著論一篇叙御史正邪得失正擢誅滅附卷末以爲世戒

中台志十卷

右唐李筌撰起殷周迄隋唐纂輔相邪正之迹分皇王霸亂二五類以爲鑒戒唐相以李林甫陳希烈附皇道筌上元中乃自表天寶初迫以綴名云

翰林志一卷

右唐李肇撰撫唐世翰林院中供奉儀則制誥書詔

之式

翰林盛事一卷

右唐張著撰記唐朝儒臣美事九三十八

史館故事三卷

右不題撰人姓名記史館雜分六門迄於五代李獻臣以爲後周史官所著

宰相拜罷錄一卷

右皇朝陳繹奉詔編起范質止曾公亮所載拜罷之由與實錄不同元祐史臣謂繹多出己意

樞府拜罷錄一卷

右皇朝陳繹編起魏仁浦止宋綬

翰林續志二卷

右皇朝蘇易簡在翰林院最承 太宗暎遇錄國朝政事以續肇志子耆采易簡所載之餘成一卷附益之

金坡遺事三卷

右皇朝錢惟演撰載 國朝禁林雜儀式事迹并學士名氏文元公 眞宗禮待儒臣三事附于卷末

麟臺故事五卷

右皇朝程俱撰紹興初復館職俱首入館纂集舊聞成十二篇

唐六典三十卷

右唐玄宗撰李林甫張說等注以三公三師三省九寺五監十二衛等例其職司官佐叙以秩品擬周禮六官云蓋唐極治之書也雖不能悉行於世而諸司遵用殆將過半觀唐會要請事者徃徃援據以爲實或以爲此書雖成於開元間而不行於一時不學之言也

嘉祐御史臺記五十卷

右皇朝馮潔已撰御史臺有記始於武后時姚廷筠其後韓琬韋述嗣有紀者嘉祐中王疇命潔已續之

乃上自 太祖建隆之元迄於嘉祐八年凡一百四
年分門載其名氏行事繁已拯之子也爲叙傳兩篇
述其父之事附于後

儀注類

封禪記五十卷

右皇朝丁謂等撰大中祥符元年詔謂與李宗諤陳
彭年以景德五年正月三日天書降於左承天門鷓
吻之上迄十月泰山修封事迹儀注詔誥編次成書
上之 御製序冠之於首

祀汾陰記五十卷

右皇朝丁謂撰大中祥符三年八月降祀汾陰御札
至明年春禮成四年詔與陳彭年編次事迹儀注踰
二年成書上之

皇祐會計錄六卷

右皇朝田貺元鈞兩為三司使約景德會計銀以皇
祐財賦所入多於景德而其出又多於所入著為皇
祐會計錄上之冀以悟上庶更立輕制使民完實而
縣官有餘用者

吉凶書儀二卷

右皇朝胡瑗翼之撰略依古禮而以今體書疏儀式

附之

本朝事實三十卷

右皇朝李攸編次雜纂 國朝事儀注為多

服飾圖三卷

右唐李德裕編共五十五事

刑法類

刑統三十卷

右皇朝竇儀等詳定

疑獄三卷

右晉和凝撰纂史傳決疑獄事其上卷凝書也下中

卷凝子嶽所續

元豐斷例六卷

右元豐中法寺所斷罪此節文也

諸路將官通用勅二十卷

右皇朝宗寧中修

紹興勅十二卷令五十卷格三十卷式三十

卷政和二年以後赦十五卷

右皇朝張守等紹興中被 旨編修

地理類

渚宮舊事十卷

右唐余知古撰自鬻萬熊至唐江陵君臣人物事迹史子傳記所載者悉纂次之

水經四卷

右漢桑欽撰成帝時人本經三卷後魏酈道元注道元範之子爲政嚴酷蕭寶夤叛死之史稱道元好學歷覽奇書撰注水經行于世

洛陽伽藍記

右元魏羊銜之撰後魏遷都洛陽一時王公大夫多造佛寺或捨其私第爲之故僧舍之多爲天下最銜之載其本末及事跡甚備

青城山記一卷

右僞蜀杜光庭賓聖撰集蜀山若水在青城者悉本道家方士之言

東京記三卷

右皇朝宋敏求編開封坊巷寺觀官廨私第所在及諸故實極其精博

相臺志十二卷

右皇朝韓琦欲編次未成郡守李琮命郡文學掾陳申之効宋敏求河南志成此書

河南志二十卷

右皇朝宋敏求以唐韋述兩京記爲未備演之爲長安河南志司馬光爲之序

明越風物志七卷

右皇朝姜嶼撰以明州本越地故曰明越又以郭璞注爾雅多引江東故詳載其風物云

蜀記一卷

右皇朝張守約撰載孟昶初降至蜀事

皇祐平蠻記一卷

右皇朝馮炳撰記儂智高叛朝廷遣狄青平之

成都古今記三十卷

右皇朝趙抃自慶曆至熙寧凡四入蜀知蜀事爲詳
撫其故實以類相從分百餘門

九域志十卷

右皇朝王存被旨刪定總二十三路京府四次府
十州二百四十二軍三十七監四縣一千一百三十五
戴斗奉使錄二卷

右皇朝王曙撰曙景德三年爲契丹主生辰使祥符
二年爲弔慰使所錄也

浮休居士使遼錄二卷

右皇朝元祐甲戌春張舜民被命爲回謝大遼弔祭

使鄭价爲副錄其往返地里及話言也舜民字芸叟
浮休居士其自號云

嘉州志二卷

右皇朝呂昌明撰以嘉州圖經增廣之

西夏湏知一卷

右皇朝劉溫濶守延州日編錄僞境雜事

匈奴湏知一卷

契丹歸朝人田緯編次

蕃爾雅一卷

右不載撰人姓名以夏人語依爾雅釋以華言

雞林志三十卷

右皇朝崇寧中劉逵吳拭使高麗王雲爲書記官旣歸櫛輯其會見之禮聘問之辭類分爲八門

廬山記五卷

右皇朝陳令舉舜俞撰先是劉煥嘗爲記今舉因而增廣之又爲俯視圖紀尋山先後之次云

春秋地譜十二卷

右皇朝楊澍編十三國地皆釋以今州縣名并爲圖於其後蓋常氏已嘗有此書而澍增廣焉

宜春傳信錄三卷

右皇朝羅誘述載其地古今人物及牧守政跡山川靈異云

袁州孚惠廟錄一卷

右皇朝張懋纂記仰山二神靈異之迹

輿地廣記三十八卷

右皇朝歐陽志纂自堯舜已來至于五代地里沿革離合皆係於今郡縣名或云無所謂歐陽志者特假名以行其書耳

青唐錄二卷

右皇朝汪藻撰青唐吐蕃遺種也崇寧中命童貫取

湟廓西寧州擒趙懷德 上爲之御樓受降宰臣蔡
京以下進官有差

三輔黃圖一卷

右未見撰人隋經籍志唐藝文志皆有其目蓋古書
也記秦漢以來宮殿門闕樓觀池苑在關輔者曰三
輔黃圖言東都不與焉

雲南志十卷

右唐樊綽記雲南山川物產雜事止咸通中

梁益記十卷

右皇朝任弁撰天禧中游宦于成都以蜀記數家其

言皆無所據依乃引書傳刊正其謬

蜀三神祠錄五卷

右皇朝并度編任四川漕日泉梓潼灌口射洪三神祠碑文板記成此書云

蕃禺紀異五卷

右皇朝馮拯撰拯淳化中謫知端州見嶺表鳥獸草木民俗物情舉異中原錄之類爲二千門凡三百事還朝上之

生辰國信語錄一卷

右皇朝寇瑊撰瑊與康德輿天聖六年使契丹賀其

主生辰往返語錄并景德二年至天聖八年使副姓名及雜儀附于後

零陵摠記十五卷

右皇朝陶岳撰永州地理志也今永州所部才三縣其所錄多連及數郡自序云以其皆零陵舊地故收之

南行記二卷

右王仁裕撰晉天福三年仁裕被命使高季興記自汴至荆南道塗賦詠及飲宴酬殆百餘篇

洛陽名園記一卷

右皇朝李格非撰記洛中園圃自富鄭公以下十九

所其論以爲洛陽之盛衰爲天下治亂之候園圃之興廢爲洛陽盛衰之候則園記之作豈徒然哉公卿大夫忘天下治忽欲退享此得乎唐之末路是也

傳記類

黃帝內傳一卷

右序云錢鏗得之於衡山石室中後至漢劉向於東觀校書見之遂傳于世

穆天子傳六卷

右晉太康二年汲縣民盜發古冢所得凡六卷八千五百一十四字詔荀勗和嶠等以隸字寫之云按春

秋左氏傳穆王欲肆其心周行天下將皆有車轍馬跡焉此書所載即其事也穆王好巡狩得驪驪綠耳之乘造父爲御以觀四荒北絕流沙西登崑崙與太史公記同汲郡收書不謹多毀缺雖其言不典皆古書頗可觀覽郭璞注本謂之周王遊行記昉之時古文已不能盡識時有闕者又轉寫益誤殆不可讀

漢武內傳二卷

右不題撰人記王母降

漢武故事二卷

右世言班固撰唐張柬之書洞冥記後云漢武故事

王儉造

漢武洞冥記五卷

右後漢郭憲子橫撰其序言漢武明雋特異之主東方朔因滑稽浮誕以匡諫洞心於道教使冥跡之奧昭然顯著故曰洞冥

十洲記一卷

右漢東方朔撰班固贊言朔之詖諧逢占射覆其事浮淺童兒牧豎莫不眩耀而後世好事者因取奇言恠語附著之朔豈謂此書之類乎

楊貴妃外傳二卷

右皇朝樂史撰叙唐楊妃事迹迄孝明之崩

趙飛燕外傳一卷

右漢令玄子于撰茂陵卞理藏之於金縢漆櫃王莽之亂劉棻得之傳于世晉荀勗校上

閩川名士傳三卷

黃璞一本作皇甫璞

右唐黃璞撰唐神龍以來閩人知名於世者効楚國先賢傳爲之

王子年拾遺記十卷

右梁蕭綺叙錄晉王嘉字子年嘗著書百二十篇載伏羲以來異事前世奇詭之說書逸不完綺拾綴殘

輯而叙之

汾陽王家傳十卷

右唐陳雄撰雄本汾陽王郭子儀僚吏後又從事渾
瑊幕府故傳不名第九卷錄行狀第十卷錄副佐三
十三人大將二十七人曰忠武將佐略

降聖記五十卷

右皇朝丁謂撰大中祥符五年十月十七日

聖祖降七年謂請編次事迹詔李維宋綬晏殊同編
天禧元年上之

先天紀三十六卷

右皇朝王欽若集 聖祖趙諱即軒轅黃帝也故欽
若奉詔編次傳記黃帝事迹 上之賜名先天紀
御製序冠其首

柳氏序訓一卷

右唐柳玭叙其祖公綽已下內外事迹以訓其子孫
吳湘事迹錄一卷

右唐大中中李紳鎮揚州陷湘州以罪抵死後其兄
汝納辯訴其枉狀錄摠載焉

王魏公遺事四卷

右皇朝王魏公旦相 真宗其子素錄遺事凡百餘

條分四卷

王文正公言行錄三卷

右皇朝王文正公曾相 仁宗其弟皞錄其平生言行凡六十事李清臣爲之序

張忠定公語錄四卷

右皇朝張忠定公諫守蜀有善政甘肅人李旼紀其語論可以垂世者

西李文正公談錄一卷

右西李文正公昉也相 皇朝太宗示其子宗諤錄其平生所談十七事

韓魏公家傳二卷

右皇朝韓忠彥撰錄其父琦平生行事近世著史者喜采小說以爲異聞逸事如李繁錄其父泌崔胤記其父慎由事悉鑿空妄言前世謂此等無異莊周鮒魚之辭賈生服鳥之對者也而唐書皆取之以亂正史由是近時多有家傳語錄之類行于世陳瑩中所以發憤而著書謂魏公名德在人耳目如此豈假門生子姪之間區區自列乎持史筆其慎焉

魏國忠獻公別錄三卷

右皇朝韓魏公琦相 仁宗英宗其門人王豈叟記

其言論事實然以國史考之其歲月往往抵牾蓋失之誣也

潛德錄一卷

右皇朝呂誨獻可之孫撰記其祖乞立

英宗言章

文潞公私記一帙

右皇朝文彥博以撰元豐初王堯臣之子同老以其父至和中所撰立英宗為皇子詔草上之且曰時宰相文彥博富弼知狀神宗以問彥博彥博具以實對至元祐中西易為言官因為韓忠彥爭辯其事

彥博乃著此其後云自古唯霍禹云縣官非我家將軍不得立此楊復恭自稱定策國老謂昭宗爲門生天子皆鞅鞅不道之言卒被夷滅

鐘山日錄二十卷

右皇朝王安石介甫撰紹聖間蔡卞合曾布獻于朝添入神宗實錄陳瑩中謂安石旣罷相悔其執政日無善狀乃撰此書歸過于上掠美於己且歷詆平生不悅者欲以欺後世於是著尊堯集及日錄不合神道論云

嘉祐名臣傳五卷

右皇朝張唐英傳 仁宗朝賢臣五十餘人

晁以道楊雄別傳一卷

右族父詹事公撰雜取諸書所載雄逸事爲一編系之以贊

忠臣逆臣傳三卷

右皇朝楊堯臣撰忠臣謂李若水也逆臣謂劉豫也
相國鄴侯家傳十卷

右唐李繁撰繁鄴侯之子也大和中以罪繫獄當死
恐先人功業不傳乞廢紙掘筆於獄吏以成傳藁戒
其家求世聞人潤色之後竟不果宋子京謂其辭浮

修云

唐宋科名分定錄三卷

右不題撰人元符間所著書也序云己卯歲得張君房所誌唐朝科場故事今續添五代及本朝科名分定事迄於李常寧云

開元天寶遺事四卷

右漢王仁裕撰仁裕仕蜀至翰林學士蜀亡仁裕至錫京採撫民言得開元天寶遺事二百五十九條

明皇幸蜀記兩卷

右唐宋巨纂記明皇幸蜀迄于復歸京師

傳信錄

右皇朝鮮于綽大受撰記 國朝雜事多言元豐以後
朝廷政事得失人物賢否

譜謀類

姓源韻譜五卷

右唐張九齡撰依春秋正典柳氏萬姓錄世本圖摺
撫諸書纂爲此譜分四聲以便尋閱

元和姓纂十一卷

右唐林寶撰元和中封閩具於諸家姓氏太原其人
乃言非本郡憲宗令宰相命寶纂諸家姓氏外各依

四聲類集每韻之內則以大姓爲首

鮮于氏卓絕譜一卷

右唐書藝文志有其目喬珪撰紹興初鮮于戡續之
闕里世系一卷

右皇朝孔宗翰重修孔子家譜也唐藝文志有孔子
系業傳今亡其家所藏譜雖曰古本止叙承襲者一
人故多踈略宗翰元豐末知洪州刊于牘紹興中端
朝者續之止於四十九代洪興祖又以史記并孔光
孔僖傳及太子賢注與唐宰相世系諸書校正直作
年譜例于卷首云

書目類

藝文志見闕書目一卷

右唐書藝文志近因朝廷募遺書刻牘布告境內下注書府所闕俾之訪求

崇文摠目一卷

右皇朝崇文院書目也隋嘉則殿書三十六萬卷至唐散失已多崇文書比之唐十得三而已自經丙午之亂存者無幾矣

吳氏西齋目一卷

右唐吳兢錄其家藏書凡一萬三千四百六十八卷

兢自撰書附于正史之末又有續抄書列于後

道藏書目一卷

右皇朝鄧自和撰太洞真部八十一秩靈寶洞玄部
九十秩太上洞部三十秩太真部九十六秩太平部
一十六秩正一部三十九秩凡六部三百一十一秩

大宋史館書目一卷

右皇朝史館書摠計一萬五千一百四十二卷

邯鄲圖書十志十卷

右皇朝李淑獻臣撰載其家所藏圖書五十七類釐
爲十志

昭德先生郡齋讀書志卷第二下

昭德先生郡齋讀書志卷第二皆出於先王之官咸
子部其類十六一曰儒家類二道本然特學者之過
類四曰名家類五曰墨家類六先王之所不廢故附
類八曰農家類九曰小說類十之教醫卜技藝先王
曰兵家類十二曰類家類十三曰雜藝類十四曰醫
書類十五曰神仙類十六曰釋書類序九流者以謂
皆出於先王之官咸有所長及失其傳故各有弊非
道本然特學者之過也是以錄之又以醫卜技藝亦
先王之所不廢故附於九流之末夫儒墨名法先王
之教醫卜技藝先王之政其相附近也固宜昔劉歆

既錄神仙之書而王儉又錄釋氏今亦循之者何哉
自漢以後九流寔微隋唐之間又尚辭章不復問義
理之實雖以儒自名者亦不知何等爲儒術矣況其
次者哉百家壅底正塗之弊雖息而神仙服食之說
盛釋氏因果之教興雜然與儒者抗衡而意常先之
不爲所惑者鮮矣其爲患又甚於漢蓋彼八家皆有
補於時特學者失之而莊老猶足以亡晉申商猶足
以滅秦况二教無意於世不自附於聖人若學而又
失之則其禍將如何故存之以爲世戒云

儒家類

曾子二卷

右魯曾參撰漢藝文志曾子十八篇隋志曾子二卷
目一卷唐志曾子二卷今世傳曾子二卷十篇本也
有題曰傳紹述本豈樊宗師歟視隋二目一篇考其
書已見於大戴禮漢有禮經七十篇后氏戴氏記百
三十一篇七十子後學者所記是時未有大小戴之
分不知曾子在其中歟否也予從父詹事公嘗病世
之人莫不尊事孟子而知子思中庸者蓋寡知子思
中庸者雖寡而知讀曾子者殆未見其人也其以文
字面舛繆誤乃以家藏曾子與溫公所藏大戴參校

頗爲是正而盧注遂行於曾子云

子思子一卷

右周孔伋字子思撰四庫書目中無之載孟軻問牧民之道何先子思曰先利之曰君子之教民者亦仁義而已何必曰利仁義者固所以利之也上不仁則下不得其所上不義則下樂爲詐此爲不利大矣故易曰利者義之和也又曰利用安身以崇德也此皆利之大者也溫公采之著之於通鑑

孟子十四卷

右魯孟軻撰漢趙岐注自爲章指折十四篇序云軻

鄒人戰國時以儒術干諸侯不用退與公孫丑萬章之徒難疑荅問著書七篇三萬四千六百八十五言按此書韓愈以爲弟子所會集非軻自作今考於軻之書則知愈之言非妄發也其書載孟子所見諸侯皆稱謚如齊宣王梁惠王梁襄王滕定公滕文公魯平公是也夫死然後有謚軻著書時所見諸侯不應皆死且惠王元年至平公之卒九十七年孟子見惠王王目之曰叟必已老矣決不見平公之卒也故子以愈言爲然

孟子音義二卷

右皇朝孫奭等撰大中祥符中被旨校正孟子因以張鎰于公著音義參考成書上之

五臣解孟子十四卷

右皇朝范祖禹孔武仲吳安詩豐稷呂希哲元祐中同在經筵所進講義貫穿史傳辭旨精贍

橫渠孟子解十四卷

右皇朝張載子厚撰并孟子統說附于後

荀子二十卷

右趙荀况撰漢劉向校定除其重複著三十二篇爲十二卷題曰新書稱卿趙人名况當齊宣王威王之

時聚天下賢士稷下是時荀卿爲秀才年十五始來
遊學至齊襄王時荀卿最爲老師後適楚相春申君
以爲蘭陵令已而歸趙按威王死其子嗣立是爲宣
王楚考烈王初黃歇始相年表自齊宣王元年至楚
考烈王元年凡八十一年則荀卿去楚時僅百歲矣

新書十卷

右漢賈誼撰著事勢連語雜事凡五十八篇劉向校
定除其重複者或取漢書誼傳附于後

范氏注太玄經十卷

右漢揚雄撰雄字子雲準易而作太玄覃思渾天書

爲三方九州二十七部八十一家以三相乘爲八十一首首爲九贊共七百二十九贊二贊當一度以盡周天三百六十五度又爲躋二贊以當四分度之一以五行爲一家起于中孚而終於頤范望字叔明晉人也爲解其序云子雲著玄栢譚以爲絕倫張衡擬五經自侯芭受業之後希有傳者建安中宋衷陸績解釋之文字繁猥今以陸爲本錄宋所長訓理其義爲十卷且以首分居本經之上以測散處贊辭之下其前又有陸績序以子雲爲聖人云

太玄經十卷

右皇朝徐庸注庸慶曆間人也以范望解指義不的因王涯林氏諸解重爲之注取王涯說玄附於後及自爲玄蹟通名之爲太玄性總其自序云尔又多改其文字如以乾爲仉以姬爲媧以牡凡爲札乃以半爲手以變爲變以稚爲推之類其所謂林氏者林瑀也

太玄經疏十八卷

右皇朝郭元亨撰元亨序云昔揚雄作玄傳之侯芭後獨有張衡栢譚張華見而稱嘆吳郡鄒伯歧求本不能得宋衷爲訓解陸績爲注解皆未明白范叔明王涯皆注之元亨在蜀自淳化末迄于祥符八年僅

三十年撰成今疏又云太玄潤色於君平未知出何書也

法言十三卷

右漢揚雄撰皇朝司馬光集晉李軌唐柳宗元皇朝宋咸吳祕注雄好古學見諸子各以其知舛駁不與聖人同是非頗謬於經故人時有問雄者常用法應之譏以爲十三卷象論語號曰法言每篇復爲序贊以發其大意

新序十卷

右漢劉向撰向當成帝時典校書因採傳記行事百

家之言刪取正辭美義可勸戒者爲新序說苑共五十篇新序陽朔元年上世傳本多亡闕 皇朝曾子固在館中自校正其訛舛而綴緝其放逸又之新序始復全

說苑二十卷

右漢劉向撰以君道臣術建本立節貴德復恩政理尊賢正諫法誠善說奉使權謀至公指式談叢雜言辨物修文爲目鴻嘉四年上之闕第十三卷曾子固校書自謂得十五篇於士大夫家與宗文舊書五篇合爲二十篇而叙之然止是析十九卷作修文上下篇耳

鹽鐵論十卷

右漢相寬次公撰寬汝南人孝昭時丞相御史與賢良文學論鹽鐵事因撰次之

潛夫論十卷

右後漢王符撰在和安之世耿介不同於俗遂不得進隱居注書二十餘篇以譏當時失得不欲彰顯其名故號潛夫云

中論二卷

右後漢徐幹所撰幹鄴下七子之一人也仕魏王國文學建安之間嫉詞人美麗之文不能敷散道教故

著中論二十餘篇辭義典雅當世嘉歎之此本無復三年制役二篇

家訓七卷

右北齊顏之推撰之推本梁人所著凡二十篇述立身治家之法辯正時俗之謬以訓諸子孫

續家訓八卷

右皇朝董正功撰續顏氏之書

家範十卷

右皇朝司馬光君實撰取經史所載賢聖修身齊家之法分十九門編類以訓子孫

正蒙書十卷

右皇朝張載子厚撰張舜民嘗乞追贈載于朝云橫渠先生張載著書萬言名曰正蒙陰陽變化之端仁義道德之理死生性命之分治亂國家之經罔不究通方之前人其孟軻揚雄之流乎

潛虛一卷

右皇朝司馬光擬太玄撰此書以五行爲本五五相乘爲二十五兩之得五十首有氣體性名行變解七圖然其辭有闕者蓋未成也其手寫草藁一通今在子健姪房

帝學十卷

右皇朝范祖禹編纂自古賢君下迨祖宗務學事
跡爲一編以勸講

理窟二卷

右題曰金華先生未詳何人爲程張氏之學者

文中子中說十卷

右隋王通之門人共集其師之語爲是書通行事於
史无考焉隋唐通錄稱其有穢行爲史臣所削今觀
中說其迹徃徃僭聖人模擬竄竊有深可恠笑者獨
貞觀時諸將相若房杜李魏二温王陳皆其門人予

嘗以此爲疑及見關朗李德林薛道衡事然後知其皆妄也通生於開皇四年而德林卒以十一年通適八歲固未有門人通仁壽四年嘗一到長安時德林卒已九載矣其書乃有子在長安德林請見歸援琴鼓蕩之什門人皆霑襟關朗在太和中見魏孝文自大和丁巳至通生之年甲辰蓋一百七年矣而其書有問禮於關子明隋書薛道衡傳稱道衡仁壽中出爲襄州總管至煬帝即位召還本紀仁壽二年九月襄州總管周搖卒道衡之出當在此年也通仁壽四年始到長安是年高祖崩蓋仁壽末也又隋書稱道

衡子收初生即出繼族父孺養於孺宅至於長成不識本生其書有內史薛公見子於長安語子收曰汝往事之用此三事推焉則以房杜輩爲門人抑又可
知也

刪孟

右皇朝馮休撰其序云觀孟軻書時有叛違經者殆軻之沒其門人妄有附益耳將刪去之懼得罪於獨見遂著書十七篇以別其僞其後溫公蘇子瞻皆嘗疑軻之言有與經不合者蓋始於休云

太玄經解十卷并發隱三卷釋文一卷

右皇朝張登撰嘉祐中成都帥蔣堂獻其書于朝詔書寵獎賜號同退處士實錄稱登字隱之雙流人通經術善屬文性恬淡屏居林泉以養生治氣爲事

道家類

河上公注道德經二卷

右李耳撰以周平王四十二年授關尹喜凡五千七百四十有八言八十一章言道德之旨其末云使民復結繩而用之蓋三皇之道也河上公注晉葛洪曰河上公者莫知其姓名漢孝文時居河之上侍郎裴偕言其通老子孝文詣問之即授素書道德經章句

二卷其書頗言吐故納新按摩步引之術近神仙家也傳奕謂常善救人故無棄人常善救物故無棄物四句古本無有獨得於河上公耳

老子疏六卷

右唐玄宗撰玄宗既爲注又爲疏六卷唐藝文志有之天寶中加號玄邁道德經世不稱之嘗以河上公本校之不同者百餘字以校世傳本當乙者五字當注者五十五字當塗者三十八字最與御注不同如此云天下柔弱莫過於水而堅強者莫能勝以無能易之而御注作天下莫柔弱於水而故堅強者莫之

能先以其無以易之也如此本云恬惓爲上勝而不
美而美之者是樂殺人者不可得志於天下矣吉事
尚左凶事尚右偏將軍處左上將軍處右言以喪禮
處之御注本恬惓爲上故不美也若美必樂之樂之
者是樂殺人也夫樂殺人者不得志於天下矣故吉
事尚左凶事尚右偏將軍處左上將軍處右言以喪
禮處之其不同至如此

三十家注老子八卷

右唐蜀郡岷山道士張君相集河上公嚴遵君平王
弼輔嗣郭象子玄鍾會王秀孫登公和羊祜叔子羅

仕盧裕仲儒劉仁會顧歡景怡陶隱居松靈仙裴處
恩杜弼節解張憑張嗣臧玄靜大孟小孟竇略宋文
明褚稌劉進喜蔡子晃成玄英車惠弼等注君相稱
三十家而列其名止二十有九蓋君相自爲一家言
并數之尔君相不知何時人而謂成玄英爲 皇朝
道士則唐天寶後人也絕學無憂一句在絕聖棄知
章下以唯之與阿別爲一章與諸本不同

老子指歸十三卷

右漢嚴遵撰谷神子注本理國修身清淨無爲之說
按唐志有嚴遵指歸四十卷馮廓注指歸十三卷此

本有序注而題谷神子疑卽廓也

王介甫注老子二卷王元澤注二卷呂吉甫注二卷陸佃注二卷劉仲平注二卷

右皇朝王安石介甫注介甫平生最喜老子故解釋最所致意如無名天地之始有名萬物之母常無欲以觀其妙常有欲以觀其微皆於有無字下斷句與先儒不同他皆類此後其子雱其黨呂惠卿陸佃劉仲平皆有老子注

蘇子由注老子二卷

右皇朝蘇轍子由注子由謫官鈔州頗與學浮屠者

游而有所得焉於是解老子中庸曰喜怒哀樂未發之謂中發而皆中節之謂和致中和天地位焉萬物育焉此非佛法而何六祖謂不思善不思惡則喜怒哀樂之未發也蓋中者佛法之異名而和者六度萬行之揔目也致中極和而天地萬物生於其間此非佛法何以當之天下無二道而所以治人則異古之聖人中心行道而不毀世法以此耳故解老子亦時有與佛法合者其自序如此其解是謂襲明以爲釋氏傳燈之類

劉巨濟注老子二卷

右皇朝劉涇巨濟注涇蜀人篤志于學文詞奇偉早
登蘇子瞻之門晚受知于蔡京除太學博士

文子十二篇

右李暹注其傳曰姓辛氏葵丘濮上人號曰計然范
蠡師事之本受業於老子文子錄其遺言爲十二篇
云按劉向錄文子九卷而已唐志錄暹注與今篇次
同豈暹折之歟顏籀以其與孔子並時而稱周平王
問疑依託者然三代之書經秦火之後幸而存者其
錯亂參差類如此小雅周公作也而有張仲孝友列
子鄭穆公時人而有子陽餽粟是也李暹師事僧般

若流支蓋元魏人也

列子冲虛至德真經八卷

右鄭列御寇撰御寇劉向共定八篇云繆公時人學本於黃帝老子清虛無爲務宗不競其寓言與莊周類晉張湛注唐號冲虛真經 皇朝加至德之號力命篇言壽夭不存於葆養窮達不係乎智力皆天之命也揚朱篇言肆耳目之欲而不恤生之危縱酒色之娛而不顧名之醜是之謂制命於內劉向以二義乖皆不似一家之言予以爲非也道家之學本謂世衰道喪物僞滋起或騁智力以圖利不知張毅之走

高門竟以病殞或背天真以徇名不知伯夷之在首陽因以餒終是以兩皆排擯欲使好利者不巧詐以干命好名者不矯妄以失性尔非不同也雖然儒者之道則異乎是雖壽夭窮達之非人力也必修身俟焉以爲崑墻之下而死者非正命也雖知耳目之於聲色有性焉以爲其樂也外而不易吾內嗚呼以此自爲則爲愛己以此教人則爲愛人儒者之道所以萬世而無弊歟

莊子南華真經十卷

右莊周撰晉郭象注周爲蒙漆園史按漢書志書本

五十二篇晉向秀郭象合爲三十三篇內篇八外篇
十五雜篇十一唐世號南華真經自孔子沒天下之
道術日散老聃始著書垂世而虛無自然之論起周
又從而羽翼之梧擊百世之聖人殫殘天下之聖法
而不忌其言可謂反道矣自荀卿揚雄以來諸儒莫
不闢之而放者猶自謂游方之外尊其學以自肆於
是乎禮教之大壞戎狄亂華而天下橫流兩晉之禍
是已自熙寧元豐之後學者用意之過見其書末篇
論天下之道術雖老聃與其身皆列之爲一家而不
及孔子莫不以爲陽訛孔子而陰尊焉遂引而內之

殊不察其言之指歸宗老氏邪宗孔氏邪既曰宗老氏矣庸詎有陰助孔氏之理也邪至其論道術而有是言蓋不得已耳夫盜之暴也又何嘗不知主人之爲主人邪顧可以其智及此遂以爲尊我開關揖而進之乎竊懼夫禍之過乎兩晉也

南華真經疏三十三卷

右唐成玄英撰本郭象注爲之疏義玄英字子實陝州人隱居東海貞觀五年召至京師加號西華法師永徽中流郁州書成道士王元慶邀文學賈鼎就授大義嵩高山人李利涉爲之序疏云莊周字子休

鷓冠子三卷

右按漢志鷓冠子楚人不顯名氏居深山以鷓羽爲冠因自號焉著書十五篇論三才變通古今治亂之道唐柳宗元嘗辯此書非古而韓愈獨稱焉二人皆名儒未知孰是

元倉子二卷

右唐柳宗元曰太史公爲莊周列傳稱其爲書畏累元桑子皆空言無事實今世有元桑子書其首篇出莊子而益以庸言蓋周所云者尚不能有所事實又况取其語而益之者其爲空言尤也劉向斑固錄書無

元倉子而今之爲術者乃始爲之傳注以教於世不亦惑乎按大唐天寶元年詔號元桑子爲洞靈真經然求之不獲襄陽處士王士元謂莊子作庚桑子太史公作元倉子其實一也取諸子文義類者補其亡今此書乃士元補亡者元不知其故而遽掇擊之可見其銳于譏議也其書多作古文奇字豈內不足者必假外飾與何璨注

素書一卷

右題黃石公著凡一千三百六十六言其書言治國治家治身之道而厯亂無法蓋采諸書以成之者也

無盡居士注素書一卷

右皇朝張商英注商英稱素書凡六篇按漢書黃石公圯上授子房世人多以三略爲是蓋誤也晉亂有盜發子房塚玉枕中獲此書云

抱朴子內篇二十卷外篇十卷

右晉葛洪撰洪字稚川丹陽句容人元帝時累召不就止羅浮山鍊丹著書推明飛升之道導養之理黃白之事二十卷名曰內篇十卷名曰外篇自號抱朴子因以命書

陰符經一卷

右唐少室山布衣李筌序云陰符經者黃帝之書或曰受之廣成子或曰受之玄女或曰黃帝與風后玉女論陰陽六甲退而自著其事陰者暗也符者合也天機暗合於事機故曰陰符 皇朝黃庭堅魯直嘗跋其後云陰符出於筌孰讀其文知非黃帝書也蓋欲其文竒古反詭譎不經蓋糅雜兵家語又妄託子房孔明諸賢訓注尤可笑惜不經柳子厚一掇擊也

法家類

管子十八卷

右齊管夷吾撰書富國之要述輕重九府取人之制

劉向校八十一篇今云一篇五十八篇有注解按杜佑指略序云房玄齡所注或云唐尹知章注未詳

韓子二十卷

右韓非撰非韓諸公子喜刑名法術以富國彊兵法制之策干韓王不用作孤憤五蠹說林說難十餘萬言秦王見書嘆曰得此人與之游死不恨急攻韓得非後用李斯之毀下吏治赦之不及

商子五卷

右秦公孫鞅撰魏之庶孽相秦封商好刑名之學秦委以政遂致富彊卒以刻薄致誅所著本二十九篇

今亡者三篇

名家類

尹文子三卷

右仲長氏所定尹文子篇序稱文子當齊宣王時居
稷下學於公孫龍龍稱之而前漢藝文志叙此書在
龍書上顏師古謂文嘗說齊宣王在龍之前史記云
公孫龍客于平原君君相趙惠文王惠文王元年齊
宣沒已四十餘歲矣則知文非學於龍者也今觀其
書雖專言刑名然亦宗六藝數稱仲尼其叛道者蓋
鮮豈若龍之不宗賢聖好恠妄言哉李獻臣云仲長

氏統也熙伯繆襲字也傳稱統卒於獻帝遜位之年
而此云黃初末到京師豈史之誤乎此本富順李氏家
所藏者謬誤殆不可讀因爲是正其甚者疑則闡焉

鄧析子二卷

右鄧析二篇文字訛缺或以繩爲蠅以巧爲功頗爲
是正其謬且撮其旨意而論之曰先王之世道德修
明以義爲輔誥命謨訓則著之書諷頌箴規則寓之
詩禮樂以彰善春秋以懲惡其始雖若不同而其歸
則合猶天地之勢殊而育物之化均寒暑之氣異而成
歲之功豈非出於道德而然邪自文武旣没王者不作

道德昧於天下而仁義幾于熄百家之說蠹起各求
自附於聖人而不見夫道之大全以其私知臆說譁
世而惑衆故九流皆出於晚周其言各有所長而不
能無所失其長蓋或有見於聖人而所失蓋各奮其
私知故明者審取舍之而已然則析之書豈可盡廢
哉左傳曰駟歆殺析而用其竹刑班固錄析書於名
家之首則析之學蓋兼名法家也今其書大旨訐而
刻真其言也無可疑者而其間時勦取他書頗駁雜
不倫豈後人附益之與

人物志三卷

右魏劉邵撰九一十二篇偽涼劉昺注以人物情性志氣不同當審察材理各分等列云

墨家類

墨子五十卷

右宋墨翟撰戰國時爲宋大夫著書七十一篇以貴儉兼愛尊賢右鬼非命尚同爲說云荀孟皆非之而韓愈獨謂辨生於末學非二師之道本然也

晏子春秋十二卷

右齊晏嬰也嬰相景公此書著其行事及諫諍之言昔司馬遷讀而高之而莫知其所以爲書或曰晏子

之後爲之唐柳宗元謂遷之言乃然以爲墨子之徒有齊人者爲之墨好儉名世故墨子之徒尊著其事以增高爲已術者且其盲多尚同兼愛非樂節用非厚葬又喪非儒明鬼皆出墨子又徃徃言墨子聞其道而稱之此甚顯白自向歆彪固皆錄之儒家非是後宜列之墨家今從宗元之說云

縱橫家類

鬼谷子三卷

右鬼谷先生撰按史記戰國時隱居潁川陽城之鬼谷因以自號長於養性治身蘇秦張儀師之受縱橫

之事叙謂此書即授秦儀者裨闔之術十三章本經持樞中經三篇梁陶弘景注柳子厚嘗曰劉向班固錄書無鬼谷子鬼谷子後出而峻鑿峭薄恐其言妄亂世難信尤者晚乃益出七術恠謬異其言益隘使人猖狂失守來鵠亦曰鬼谷子昔教人詭給激訐揣測儉滑之術悉備於章學之者惟儀秦而已始裨闔飛箝實今之常態是知漸漓之後不讀鬼谷子書者其行事皆得自然符契也昔倉頡作文字鬼爲之哭不知鬼谷作是書鬼何爲邪世人欲知鬼谷子者觀二子言略盡矣故掇其大要著之篇

戰國策三十三卷

右漢劉向校定三十三篇東西周各一秦五齊六楚
趙魏各四韓燕各三宋衛舊有五號向以爲皆戰國
時游士策謀政定今名其事則上繼春秋下訖楚漢
之起凡二百四十五年崇文總目多闕至 皇朝曾
鞏校書訪之士大夫家其書始復完漢高誘注今上
十篇餘逸歷代以其記諸國事載於史類子謂其紀
事不皆實錄難盡信蓋出學縱橫者所著當附于縱
橫家云

雜家類

呂氏春秋二十六卷

右秦呂不韋撰後漢高誘注按史記不韋傳云不韋相秦招致辨士厚遇之使人人著所文集論以爲八覽六論十二紀二十餘萬言以爲備天地萬物古今之事號曰呂氏春秋布咸陽市門懸千金其上延諸侯遊士賓客有能增損一字予千金

淮南子二十一卷

右漢劉安撰安淮南厲王子也襲封招致儒士賓客講道德總統仁義作爲內書二十一篇後漢許慎注慎標其首皆曰閒詁次曰淮南鴻烈首名注日記上

第七十九闕

子華子十卷

右其傳曰子華子程氏名本晉人也劉向校定其書按莊子稱子華子見韓昭侯陸德明以爲魏人旣不合又藝文志不錄子華子書觀其文辭近世依託爲之者也其書有子華子爲趙簡子不悅又有秦襄之卒在春秋前而趙簡子與孔子同時相去幾二百年其抵牾類如此且多字說繆誤淺陋殆元豐以後舉子所爲爾

論衡三卷

右後漢王充仲任撰充好論說始如詭異終有實理以俗儒守文多失其真乃閉門潛思戶牖墻壁各置刀筆著論衡八十五篇釋物類同異正時俗嫌疑後蔡邕得之祕玩以爲談助云

金樓子十卷

右梁元帝撰繹書十五篇論歷古興王之迹箴戒立言志恠雜說自叙著書聚書通曰金樓子者在藩時自號

長短經十卷

右唐趙蕤撰論王霸機權正變長短之術凡六十三

篇第十九載兵權陰謀云

致理書十卷

右唐朱朴撰乾寧中爲國子毛詩博士論述時務凡五十篇上之

事始三卷

右唐劉孝孫等撰太宗命諸王府官以事名類推原初始凡二十六門以教始學諸王云

續事始五卷

右僞蜀馮鑑廣孝孫所著

事原錄

右皇朝朱繪撰其書事始之類也

炙穀子雜錄注解五卷

右唐王勣撰二儀實錄古今注載事物之始樂府題載樂府所由起勣輯纂數家之言正誤闕疑補遺削冗併歸一編云

宋齊丘化書六卷

右偽唐宋齊丘子嵩撰張耒文潛嘗題其後云齊丘之智特大鼠之雄耳蓋不足道其爲化書雖皆淺機小數亦微有以見於黃老之所謂道德其能成功有以也文章頗亦高簡有可喜者其言曰君子有竒智

天下不親雖聖人出斯言不廢

農家類

齊民要術十卷

右元魏賈思勰撰記民俗歲時治生種蒔之事凡九十二篇

四時纂要五卷

右唐韓謬撰謬徧閱農書取廣雅爾雅定土產取月令家令叙時宜採沉勝種樹之書掇崔寔試穀之法兼刪韋氏月錄齊民要術編成

歲華紀麗四卷

右唐韓諤撰分四時十二月節序以事實爲偶儷之句附著之

錢譜十卷

右梁顧烜嘗撰錢譜一卷唐張台亦有錢錄兩卷

皇朝紹聖間李孝美以兩人所纂舛錯增廣成十卷分八品云

錢譜十卷

右皇朝董道撰道之祖嘗得古錢百令道考次其文譜之以前世帝王世次爲序且言梁顧烜唐封演之譜漫汗蔽固不可用其譜自太昊葛天氏至堯舜夏

商皆錢弊其穿鑿誕妄至此

茶經三卷

右唐陸羽鴻漸撰載產茶之地造作器具古今故事
分十門

煎茶水記一卷

右唐張又新撰其所嘗水凡二十種因第其味之優劣
茶譜一卷

右魏僞蜀毛文錫撰記茶故事其後附以唐人詩文
建安茶錄三卷

右皇朝丁謂撰錄建安園焙之數圖其器具叙採制

入貢法式

北苑拾遺一卷

右皇朝劉昇採新聞遺事附丁晉公茶經之末

補茶經一卷

右皇朝周絳以陸羽茶經不載建安故補之

試茶錄二卷

右皇朝蔡襄撰記其烹試之法

東谿試茶錄一卷

右皇朝宋子安集拾丁蔡之遺

荔支譜一卷荔支故事一卷

右皇朝蔡襄撰記建安荔枝凡三十餘種古今故事

酒經三卷

右皇朝朱肱撰記釀酒諸法并麴蘖法

續酒譜十卷

右唐鄭遨重撰輯古今酒事以續王績之書

忘懷錄三卷

右皇朝元豐中夢上人撰所集皆飲食器用之式
種藝之方可以資山居多樂者不詳其名氏

昭德先生郡齋讀書志卷三上